


劉羅陽先生詩敘

羅陽劉先生以名侍御謫佐州郡今年春
移貳吾湖值汝楠禪除諸先生郡齋始譚
詩事自惟數年廢音兼之習見下里屬和
不啻國數千人一旦睹先生所著客闖入
越二編泠然雅音迥絕流調嘆曰誠空谷
之傳也夫世之爲詩者未達性情先諧世
尚往往據按下躅遺其古初嘔心瘁神狗
聲濯字惟恐失唐人之步趨而不思終遠



乎風騷之極致敝也久矣先生獨沉浸風雅博涉騷選鑄詞命格寧違世人之好而擬議於聲詩之始豈不難哉先生曰吾豈能抗作者之林心羨玄邈哉顧詩人之派西北有關中諸部而東南幸存之吳下吳下先達最稱迪功徐先生而吾友皇甫昆弟譚藝輒推迪功其微指所在求達性情無出古調作法於始自括唐風所以願俟桓譚侯芭於百年以共竒賞太史公所謂

難與俗人言者不欲與之較工拙也吾聞之皇甫昆弟如斯而已君實皇甫氏知已二編其爲我敘之夫以予羨先生之詩而重有慨於皇甫氏之論敘之簡編因以見志豈非所至願耶初余以童子釋褐時過從皇甫子安學詩未見許可一日語次予忽曰詩三百篇皆可爲選古十九首無非律韻如云有鳥雙和鳴乃在河之洲如云南枝巢越鳥或引其詞而伸之或更其文

而韻之何慮不漸協新聲而乃尋響於景
雲垂拱之後耶早歲狂言不意子安大壯
予語締爲至友岐路生疑世風暗易予不
免徘徊流調之中而先生乃崛起不阿巖
然不易乎世二編絕勝者雅雋拔俗逸思
天成若朝華初啓天球未雕宛乎皇甫氏
之證璞也嗚呼先生之詩出於意致超絕
固不顯倚乎所聞第以予舊聞而先生獨
卓然嘿持之寧不有感也夫寧不有愧也

夫以是復先生聊爲之敘云

嘉靖戊午仲冬日德清白石蔡汝楠著

劉侍御集序

侍御羅陽劉子以所編詩二帙眎余一為
客閩一為越覽云夫劉子早歲以明經擢
第拜中書舍人選為侍御史著聲南臺三
輔至今猶欽挹風裁同官嫉其能竟遭播
遷乃謫理興化移倅吳興有是作也諦覽
閩中詩凡所賦樂府盡合古調及所擬名
家咸類其人雖鮑照代東武諸篇宮商雜
奏而並出雅音江淹擬陳思諸作丹素互

施而悉呈豔績又曷過焉非妙思通方兼
才具體能臻是耶載覽越中詩麗則自成
冲襟超悟盡去雕篆都棄塵筌如境閒花
稍落林靜鳥忘還華滋紛易歇芳願坐成
乖自是煙虹驚藻思可煩花鳥入閒情足
稱秀婉又江路愁能盡鄉園夢懶尋聊憑
寄衰髮爲道未歸心哀而不傷得風人之
旨矣矧靈巖仙鯉地接武夷天目苕霅溪
通菴畫足以饗眺興懷余弟子約與侍御

同榜亦由水曹出貳茲郡凡有占綴每
商摧江山助藻於燕公羊何附聲於靈運
實一時勝遇非獨窮愁而已若其明允折
獄庭寡諍辭沉靜當官坐惟長嘯乃克殫
心於藝焉夫詩闡成周漢魏繼作齊梁稍
靡迄唐始盛蓋唐以詩賦取士故士之工
詩猶漢之經術有專門焉如從游應制必
品其高下學士競揆於外昭容評可於中
雖讌集賡唱亦私爲甲乙推其擅場故詩

益精焉稽古栢梁而下從臣第嘉於屬車
華林以前副君課美於卽席蓋同揆矣今
輦轂之下絕口不敢談藝遷謫之人尤所
深諱乃使仰楹而纂言杜門以覓句侍御
之作有未及覲而賞之者文本關運道固
因時寧不重可慨哉侍御業已遷臬終太
夫人喪將赴闕補職嗟乎長卿輟吟於巴
嶺夢得申詠於玄都其家範驗之此行矣
嘉靖辛酉七月旣望百泉山人皇甫汈書

題客建集

羅陽先生以侍御史補外爲吾郡節推量
移浙之貳守行示余詩六帙蓋皆寓吾省
作也故曰客建集夫卽其所居在建不越
二載耳其官則有政刑相屬又才賢承
所推委驅馳道路無閒時且留滯下僚所
酬應俯仰間視持鐵章坐御史臺奔走百
執事悚息躑躅不敢犯何如自常人處之
固將鬱悒不伸方勉強事事卽思避人就

榻自逸弗暇暇他事乎乃羅陽日事事日
吟詠自適夜則讀古書率二三鼓乃罷或
搆思摘詞爲古近體詩故其積盛如許而
咸格高調逸趣遠情深盡削凡言爲珠爲
繪於古大作家奚讓予獨愛其優柔含蓄
不愠不激博雅春容洋洋颯颯蓋深有得
於詩之正者也夫子讀詩三百篇以關雎
爲首曰樂不淫哀不傷故曰發乎情止乎
禮義如其侈豔乎詞華繁縟乎音節鳴其

不平之氣而身若無所容宜其有爲之懷
而鋒有不可當謂之性情禮義之正是邪
非邪羅陽神氣最清學古極銳年且方新
名位固未量詩其可量乎哉昔王適見陳
伯玉詩曰此必爲海內文宗余於羅陽先
生亦云

嘉靖丁巳秋日石門山農退齋林雲同識

名建集序

士雅山人黃姬水著

夫天下之水流者潴者皆水也惟過龍門
下瞿峽決吕梁而天下之奇觀出焉何也
有以激之也故詩由心生不激則不奇如
屈平放而騷興馬遷辟而史作不曰詩窮
而後工哉締觀前代詩人莫匪羈臣素士
或高才沉於下秩而情多戚草或忠良遘
於遷黜而思結牢愁或王孫怨別而流落

天涯或聖哲悲窮而迫阨時俗于以宣其
拂鬱不平之氣故言多奇亦有名位通顯
逶迤廟廊者其言非不妍美謂其聲之和
平則有之若悲歌促調讀之令人動魂驚
骨者蓋鮮矣然則詩之奇果不由于激乎
客建集者羅陽侍御先生左官閩中所著
也先生懷猷秉赤述古匡今共一人憚
百僚煦萬民以展厥蘊先生之志也無何
嫉于儕列以讒謫去余嘗作詩送之曰下

位無非職南遷亦是恩蓋慰之也然先生
絀結悶歎之情必有不堪焉者咸于詩發
之一歲之間祇役者再其往來道塗及在
郡所得凡若干首走書寄我金陵猥以陳
思定文屬我噫余曷知文而先生之文可
譏彈哉旅窓閒閒披玩數周迺作而嘆曰
颯颯乎嘉藻也哉絕去陳言務臻新境體
裁於六代色繪於初唐然而不怒其風人
之遺乎分染則斷情於山陽之別登樓則

眷心於魏闕之思嚴瀨則慕子陵之節越
臺則懷萬蠡之勲仙嶺則托志玄虛梵林
則寓悰空寂省署則春芳掩閣郵亭則夜
猿擁條酬知則片言成信寄遠則雙淚將
心感草悲禽則易驚四運之改歌勞寫憤
則難消萬斛之愁觸目洩衷豈苟作者哉
初先生與余同爲郡諸生見其每試輒雋
不再比舉進士以爲不遑詩也及拜侍御
示平生譔造始知先生爲諸生時已深

於詩蓋窮探綠牒之經識盡丹碑之字腹
爲書笥而手爲筆海矣此集尤爲卓絕非
所謂激而音者耶竊怪通籍之英苟一涉
足藝林卽擯落不容於時曰詩人華而不
實也嗚呼寃哉五言起於漢而蘇李爲標
首二人者功名氣節招揭如是亦可謂華
而不實耶人之賢不肖其在於詩耶其不
在於詩耶悲乎復何言詩以窮而工人亦
以詩而窮也時有梓先生集於閩中者友

人黃姬水敘諸簡首嘉靖丙辰上巳日



客建集卷之一

茂苑行

茂苑春來風日嘉長湖瀾瀾侵平沙槐市
西頭連俠斜七條五劇競嬌奢青絲踈地
垂楊柳明妝映水學桃花承雲輕蓋飛朝
日畫鷁游舸帶晚霞千轉流鶯坐花裏百
丈織鱗見江底清江十里夾芙蓉濯錦還
憐吳父兒兩塘樓閣參差起動地笙歌鬪
繁靡黃銀作撥鳳凰調丹瓊刻管鴛鴦倚

借問豪華那得知，曾聞宋玉多微詞。館娃
妖女絕世姿，靡曼不數西家施。平明採桑
出南陌，日暮探鉤向大隄。本來解語工調
笑，何能流目盼佳期。別有相逢狹路間，意
氣盈溢韶容顏。兩童夾車問不已，猶記門
臨大道邊。三息同時冠臺省，歸來車騎填
郊廛。五重飛樓瞰魯景，九華閣道開青天。
朱鳥春窓弄金爵，翠羽文疏奏清籥。但誇
少小舞君前，豈解生愁怨。離索閑時芥羽

戲書檄更覓狸膏作鯨敵，百萬還將一擲
間談笑。輸君同瓦礫，偏稱瀟洒盛遊遨。競
逐浮誇恣陵轢，不愜江南苴蕘房。爭憐異
國返，覓香茱萸甲箭渾言俗。迷迭都梁猶
未芳，百伎朝朝出新意。擅名不讓工倕良
學，轍龜雲動飛影規。裁明月寫清光，光芒
動魄駭工緻。快詭錯落成文章，此是百年
樂休養。道化方熙歲，豐穰家家餘力繕。池
臺處處風光縱，探賞美擅東南稱。粵區底

貢瓊瑤兼篠簜軍國資儲藉富強軸艫絡
繹輸縉襁大官細錦新入筒紛紜綃轂繪
華龍珍異從知被都邑瑰麗沃若窮方中
誰言倚伏平陂理百六時逢遘屯否海徼
驚塵白日昏四野囂然棄田里轉戰無功
勢摧靡爲憂豈但多郊壘一旦身名不可
爲百年生聚將何底三吳迅疾彌驟輕連
衡上國爭承盟邇來非夫一何鄙百死何
能滌讐耻腥焰縱橫俄

上聞詔書橫海出將軍盡遣樓船下南粵
更徵板盾戍江濱占星共指天狼滅計日
應掃狐狸羣申威懸賞人思奮名鉞專征
機獨運司馬精誠契鬼神中丞朗鑒明秋
韻卽看策府奏殊勲行見臯陶誦芳問君
不見周家薄伐至太原古來何代無烽煙
蕩定還歸申甫賢旂常千祀聲華宣又不
見淮夷徐戎嘗並興詩人亦詠荆舒懲吳
兒易驚定惟怯釜魚假息何憑陵昨夜髦

頭息氛祲今朝農野歡呼甚依舊平江月
影流蘆花汀曲海東頭願與軍前留一解
共將神武曲中謳

垂虹別

解維情慊慊臨路中心結親宴未須臾榜
人戒輕柁夙昔重分携詎能遠此別別遠
去炎州繫情千里流隴日淡無色原樹淒
以幽離樽訴清管沾臆此江樓江樓益繼
繼夕陰暖郊行之子悵言旋跂予事陵綱

隱汀睇已賒引脰滄猶泫泫然其若何逝
矣逐曾波往歡劇無幾今緒積已多緒多
猶凝思扣舷動悲歌歌短雖未悉思長聊
且卽去去日以非慘慘備難述三任重遭
迴誰能念淹恤淹恤慨臨岐促駕卽前期
辛勤洲渚度蹉跎晚雲馳閩山鬱差峩閩
水含清姿含姿日夕佳良願不克偕墟里
形神越寤寐平生乖藉此徑寸翰因之游
子懷

飛來峯

青霞開洞府寒玉結玲瓏丹穴含靈氣珠
庭吐邃風憇深逢石髓招遠命飛鴻彷彿
僊蹤在幽香生桂叢

別陳子

離歌日隱樹別緒倚曾颺摠駕予方發舍
情景重低山高龜落早霧苦鴈來遲況乃
盈樽酒何時當共持

江上逢龔使君

幾年浮跡寄連牆江上相逢意轉傷數問
行藏窺藻賦更驚淪落悔迷方向來積思
將秋遠此日羈情入酒長疇昔已應零謝
盡青雲回首重微茫

建陽道望武夷

斜溪蘊色發新晴入漢飛岑隱化城七采
芙蓉開錦嶂九華宮闕倚丹屏連延靈氣
霞中見縹緲僊雲石上清翹跡魏君如可
遇便隨游霧到神京

賒方平洲

幸從寬政荷恩原量遣鐫階出禁垣去國
自憐多舛忤逢君猶爲雪沉寃詩傳藻志
懸相許詞溢溫情枉見存促路徂年悲短
策願因精理慰營蒐

賒佩蘭兼呈平洲

緒官荷成貸逢恩眷南遷懷新徒自誚義
譽非所憐何言悼羈旅披心值羣賢溫藻
相光飾淹誠愧采甄微用振沉痼因之起

纏綿狹劣定無取親宴重欵然啣意悵何
極愴深難具宣憶昔未聞道妄欲康世邇
摧殘動遭譴憂患坐相煎幸哉覲明哲殷
勤授我篇土風旣可樂泉石復芊眠聊取
季主卜開扉瞰平川

鎮海樓集樓據山俯城閩之要也

遠開雄勝業神樓襟帶山河表八州海上
翔鷗窺井幹雲間雙鶴戲城頭風驅冥色
川原盡日汎長霞島嶼浮形便從教誇虎

據豪華滿目付江流

省署

樓影殷庭暮風枝寫玉琴人今投跡淺月
自映簷深流靄渾無染飛香似可尋詎驚
衰道氣終是出塵心

隣霄臺

歲蕤高岫薄雲天影入寒空百仞懸霞構
璇臺華露冷星垂綺井玉波連飛暉盡遶
巖前桂凝黛初開石上煙日暮城闌車騎

含芳塵十里氣澄鮮

答佩蘭袁丈

偃仰及歲陰餘芳靄清旭梧竹森已行歲
沙湛猶綠煙霞半壁深幽思入門足況乃
青雲交徜徉散羈束妙解欲遺生廢形時
振俗玄悟曠心期飛藻揚新曲晚暮欣有
歸從君賦空谷

發芋原

高冬理檝事晨征津吏持船發煙嶼長風

忽起吹石裂驚波
又浪來何許激噉禹疆
鼓洪怒嘐嘐黑蜨驅儔侶
幽壑黯黯走玄
恠陰崖慘慘聞龍語
翠芝杳藹出虛無
水碧芬萼揖神女
薄暮揚帆截迅流
輕撓蕩漾臨前渚
畏路驅馳那得停
湏臾失勢嗟無所
倏開寒霧湛滄浪
新月徘徊下平楚
越人驚柂扣舷歌
谷嚮灘聲亂憂緒
河隄極望應如是
予欲乘桴從此去
寄言川上數老翁
青雲招手看遐舉

憶陳子

寒水遙連越岫孤
迢迢雀舫入煙蕪
忽聞笛裏傳幽緒
還憶山陽舊酒徒

江行

踈蕪泛影浸雲樓
江郭寥寥俯翠楸
煙際流禽千嶂入
霞間挂月兩峯齊
水光縈蔚遙含碧
石勢參差遠向隄
極目兼葭催暮色
曲中楊柳爲誰低

蒼峽道中

連岫微茫並澗躋歲嚴零葉擁幽溪午寒
細遶松蘿散山霧平連嶠木齊陰磴氣深
光自濕青掄嵐重徑常迷纓影懸度諸川
上蓋轉斜臨亂巘西翠沐垂崖知桂發雲
來曾峴與天低衝飈紫蔚飛蓬盡夕霞徐
流蕩靄淒旅髮冰霜情未遣天涯雨雪賦
堪題煙將暝色吹心遠林帶泉聲入枕啼
叱馭從教凌九拆摧輪無那恨長嘶甫令
淹薄悲浮梗可是栖遲惜障泥遙向飛梁

薄望更攀幽樹結留萸迢迢物序經時
宴獵獵驚沙撲馬蹄懷祿彷徨惟濺淚感
時慷慨詎關雞虛言遐志耽玄寂不耐風
塵緇素綈翹注吳關何處覓願因歸翼指
巖棲

東飛伯勞歌

蕙樓新景下芳菲樹裏新鳥送新暉誰家
妖麗花中見笑向花枝爭粉面流霞映戶
開初月風吹態落衣香發年幾三五髮纔

齊一顧從令上蔡迷志若丹青未明義爲
言上客何容易

嘖娥嬌轉不勝春翠情芳思管中新誰家
巧笑出花陰吹香吐艷驚人心清姿縹緲
飛蘭緒纖腰婉弱輕鴻舉年時二八正風
流含笑眼語迴明眸定知妖冶花應妬詎
惜韶華虛擲度

山行寄憶

崇霜肅肅厲寒原長岫陰凝嚮夜猿莫向

南雲頻送目祇應北鴈踏消魂

白紵歌

朱唇玉面華燈前逸艷飄飄只自僊金膏
薇露發春妍皎如桃萼含紫煙雲堂灼爍
羅象筵麗曲新調蜀國絃那知步步欲生
蓮空憐歌舞度芳年

輕軀宛轉紅袖芳隋珠七采耀明當溫玉
爲肌體自香流津微散粉中光麗心婉態
隨風揚參差朝日照杏梁齊唱可憐金鳳

鳳樂莫斯樂無相忘

舒朱耀碧麗璇堂蘭屏椒閣吐飛芳鴛鴦
兩兩嚮高張翡翠羣飛遠栢梁千尺銀水
落金塘美人綿渺嬌紫房愛而不見遙相
望夜深沉沉思未央

朗笛發哀箏流清風徐激絃管適烹膏
擊鮮羅衆羞夜以繼日秉燭游高彈我我
奏齊謳四座咸起紛獻酬西飛浮景不可
留今我何爲心悠悠

出分水關

崇嶺入長煙崔巍曲磴延女牛星野別廡
越地形偏二水分霞上重關綴日邊雲危
寒不望蓬跡使心懸

歲盡

歲盡猶登陟鳴颺愁我心哀猿朔氣入去
烏夕煙沉林斷分巒色峯交動澗陰蕭條
深度隴旅髮豈重任

山驛

山驛情紆鬱飄搖感薄游垂陰渾入夜返
景欲啣樓風嶺寒逾迫霜途望轉適亂崖
交雨雪旌旆強悠悠

曉行

長道引憂端遙瞻起數歎野深隨炬冷林
暗帶星殘隔澗霞方辨空山水去寒未醒
塵土夢猶自遶煙巒

宵征

彌前凌促景侵夜騰遐征暝樹全疑失迷

禽暗自驚風音隨谷遠月色帶寒輕意氣
平生盡長游不問程

述征

炯志嗟牽滯歸心切奮飛連波遙可度危
岸迥難依歲謝臨窮晏霞流映落暉沉沉
事徂兩淒斷不堪悲

行袂色侵霞山寒霽晚鴉平雲入輕蓋危
響咽鳴笳石密溪光冷松深霧影斜天邊
煙近遠空軫望歸賒

煙壁度鳴鑣松聲帶澗遙景寒將夕氣霜
橫入風霄葉下雲間樹沙驚霧裏橋欲知
心昔絕流月在蘭椒
浮踪竟何托是日最關情僚慄旌竿急蒼
涼翔野明霜花承意發空凜逐簷生無耐
蓬將雪飄飄只自輕

夜中發信溪

迥野方遙夜依星入使駢繁霜深吐色纖
月亦流輝木拆關河動煙空雁影稀侵肌

渾自烈亂眼不驚衣爲問一高士何如
絮歸

歲寒窮路喻內作

彌年流浪跡常迷短褐相隨信馬蹄凜切
冰姿嬌自澁淚消霜色怨成悽不將敗絮
慚兒子何用牛衣愧拙妻世路若言爲客
易誤卿應是一生啼

曉發玉山

崇寒遙振野客思劇天涯枝靜浮殘月山

幽汎早霞望迷途似盡掃絕旆還斜蘭隩
澄陰淨巖阿積翠賒鏡音催霽色林外起
昏鴉

懷往 二首

我昔際昌景綰組三事堂結交感賓友蔚
若風雲翔意氣溢寰海談笑吐蘭芳一往
千載輕流連玩景光臧耳縱清辨抵掌爲
樂方陳詩逸調上理詠清芬揚傲岸平生
事英風不可量誰言若雨絕悠悠何詎央

又

海水測天寒霜嚴加袖短長風厲廣術日
夜吹蓬斷慘烈特兼常雍雍失和侃捐瘞
負時坵沉光畀荒散因之去情塗幸免從
夷蚤親愛夙昔離不獲申言款悔吝詎關
人深尤疑任誕顧路跼以悲哀歌爲誰纂
流俗苦凌諄惻惻心不緩

懷玉道中

野途紛未極平莽自荒深含景山疑淺沿

流溪轉陰石幽雲不斷樹冷月偏沉孤劍
悲風裏年年旅思侵

烏棲曲

絳樹新妝花比艷妖姬逐舞笑開靨可憐
歌管復會情揚蛾送曲作嬌聲
合歡帶織鴛鴦文連理裾開蛺蝶裙江南
調急採蓮唱影落波中兩搖颺
玄服携持淇水上翠機芳風生錦浪蘭音
宛轉出花中氣如芳霧泛輕缸

葡萄作錦芙蓉裳芍藥爲贈茱萸芳吐心
寄君君不顧風吹花落紅顏暮

結客少年場

少年幽并兒談笑發英姿七采蓮花劍雙
螭白玉羈掣影若流電絡馬纏青絲朝游
夷門卒夜歌高漸離一言毛髮立泰山應
可移決命杯酒間睚眦風雲馳飛刃出都
市報讐過九達長虹爲貫日吏縮不敢窺
還飛聊城箭直解邯鄲危珪組義不辱激

烈揚高眉黃金行散盡壁立無餘貫列頸
爲君死誰牽中顧私

烏夜啼

漢有游女名碧玉何用飾之黛用綠輕題
飛翠學明星素臉舒光發華燭嬌啼慊慊
恨常嘖緩舞纖纖腰似束直置春心不自
持托言城上烏棲曲

至嘉禾

霜滿馳歸鞅言過橋李亭石門猶挂月舊

館自踈星已隱吳煙白還憐越甸青可能
悲泛梗客歲幾沉冥

茗溪道中

茗水汎莓苔輕舄隱棹來煙光兼露發山
影帶雲開徑出寒桑淨帆依野岸迴還同
燕客望極目自堪哀

次黃子除夕韻

阮途驚歲夕悽思霑燈前重此天涯客其
如游子憐風塵良失性服食詎餘年願以

幽棲志承君契道筌

別二盧生

朝維靈震渚夕纜羨山椒芳草征帆度春
煙客思消春言停落日分緒急驚飈欲識
情紆鬱夜絃彈寂寥

別陳子

爲別歲方新愧君相送頻禽鳴渚色煙
月渡江春繾綣啣知己慇懃見故人有情
空復憶愁緒是風塵

別二章生

飛靄蕩朝暉江雲照薜衣芷芳含思遠林
色帶煙微道謝恩逾薄情移望屢違翻令
憐自出回首但依依

陽羨山行

長風吹海色千里上危旌哀壑朝煙接空
林夕澗驚微香初破萼嬌響漸聞鶯引望
春盈思偏傷客子情

山行懷黃子

新翠下楊林韶光繫遠心
懷人看草色命
思染春陰灑翰花時憶
開絨夢裏尋懸知
還古調梁甫有長吟

漂陽道中

芳燈遶新霞雲深映水涯
青枝啣過鹿丹
杏吐先花目駛流光閱情多
畏景斜自來
傷出處何況及韶華

道建平山中

兵境卅車接松原野燒延
綠煙生柳色芳

潤郁蘭荃忽訝崗廻合
還憐嶂鬱芋尋仙
無復遠前路是芝田

夜發廣德

松逕淨堪憐
泫泫月在煙清陰
星野澹繁
雪夜花妍林寂風偏朗
山深氣逾鮮
終知
在人境縹緲自疑仙

黃子將入閩詩以留之

聞君厭城市言采澤中蘭
掛席凌煙瀨携
家訪石壇猿懸無緩目
箭脫有驚灘若道

游梁好古來行路難

宿龍盤山中

空館鎖細縕星車到夜分
亂山斜倚暮諸壑半生雲
竄絕幽難寐蒼茫聽不聞
神情應自遠何處有塵氛

山夜猿相語空齋清道心
峯懸霄影入月近海濤候
虛籟林中杳驚覓石上深
夢分神未定輕睨宿花陰

至宣城作

澄江浮練影賞會憶宣城
風物今如此榮名古亦輕
山川詞賦在煙景歲華驚
無那清暉戀懷情底不盈

憇郵亭作

幽亭懸竹嶼野氣溢春程
鳥夢衝旌蓋花飛偶性情
連崖青映發斜隴翠分明
幸自耽游放無令桃李驚

新嶺

瞑游飛鳥上摠轡萬尋巔
路擁千蹊雪山

藏太古煙梯空雲不盡乘日逕繞懸碧落
深如此長懷一浩然

德勝嶺

披林出叢薄牽葉上青暉日勢傾巖斷雲
光接岫微澗深昏薜影嶂合慘煙霏無柰
傷人意迷踪亂嶺歸

對鏡嶺

楚天蒼嶺隔驚壑暝霞分鳳峽開玄鏡鸞
林映白雲輕煙嬌樹色妍黛染峯文影入

諸溪動猿聲未可聞

芙蓉嶺

青蓮煙際吐繡嶼倚空開不辨雲中樹寧
聞澗底雷雨昏兼瘴作山暝帶寒來登涉
誰能盡羈情自可哀

婺州雨中作

空館淹山雨妍情歲逾非煙昏春自入嵐
重石爭飛簷外生幽草窓中引翠微獨將
千載意掩抑對芳菲

謁董深山先生祠

空山肅遺像叢岫暖餘芬道自羲圖秘源
從象始分贍懷虛欲契傾睎曠相聞祠上
何年樹離離多白雲

宿深山祠

山深到空夜煙色雨餘微新水涵松岸孤
霞曳竹扉蘭滋香入夢桂長翠侵衣靜院
幽生思竟清待月輝

又

靈室遺塵境長林擁夕霏密陰臨砌結流
影向窓迴牖僻寒苔蘚庭幽洽露暉夜分
清嘯發鶴自九霄歸

重至南平別理山處

憶向河梁計自踈相思無路覓煙蕪君看
海上春雲色還似當時蕭散無

又

憐君幾共發江湄旅興應多百一詩若道
才華應取忌濫芋何事及支離

德興山中山茶盈抱花鬱然奇茂
山逕度空春名花獨向人嫣然還自笑悽
矣欲誰因嬌斂紅偏蔚輕杏色更新最憐
華月下寂寂照江津

述征

江竹便娟曙彩收春臯芳涉磴雲幽深榛
細轉巉巖石修眇清緣藹藹流側立偃松
危岸出空懸崩棧曲梁浮飄花不解羈人
意亂點衣纓祇自愁

花閑留照覆清池寒澁鶯聲轉自暉蘿逕
亂絲煙不醒柳隄千緒葉難持遙凌謝客
懷陁峴想見休公度嶺陂未拂塵纓終是
累流光欲縮柰何爲

道雨

絲雨沉孤思茫茫春晝深洩雲交澗道懸
溜寫煙林于役嗟深涉長懷散獨尋行行
出山去前路豈予心

重望武夷

春靜徐看出出嶠雲武夷山色鏡中分丹巒
窈窕含花霧碧洞芳菲映竹氛清磬泠泠
和露發仙謠歷歷隔松聞屏開九疊虛流
翠塵吏終難偶鹿羣

曉發建溪

夙駕凌驚巘蓬顏照澗幽鳥喧泉蕤落魚
戲水芝浮崩石紆修轍豐林隱去旂雲光
巖際集合思指江樓

發延津

春臯日氣昏杉葉暗孤村峯密雲常合崖
傾嚮易奔飄香臨愧亂驚蝶入花喧薄望
方無緒淇情祇自煩

次雙嵐

暄景散郊原新林綠靄繁濯枝花並語轉
葉燕爭翻風物徂春憶愁懷逝水言未庸
窮日勢柳色暮煙昏

王臺道中

彌日遡勞津芳華詎我春幾林香並異千

磴霧俱新入澗披花遠攀林拂景頻誰能
憐楚奏空自賦河澹

宿王臺

山驛對春流殘霞入夜樓一燈懸旅思孤
枕到羈愁事業驚年逝筋骸覺歲逝老當
何所作策杖訪蓬丘

次順昌

于役入山重雲來知幾峯煙瀟虛遠色雨
岫失巖容沙淺低餘柳山平長稚松勞人

常夜涉隔岸到昏鍾

朝靄

蘅野雉煙屯蘭林豹霧昏嶺氛雲作障谷
靄雨垂痕路盡楊朱泣春消杜宇覓深登
迷咫尺何處望吳門

月夜有懷

空色浸宵窓明波泛影雙戍人寒墜葉舟
楫靜清江感事同傷賈懷心欲扣龐可堪
良夜邈離緒杳殘缸

登樵溪閣

琳館俯川涯，山楹發霽霞。
水花扶浪出，簷溜入風斜。
雲缺低連浦，湍長細轉沙。
一窮千里目，無耐動年華。

次邵州

鳥啼愁歲隔，征吹慘江干。
騎自霞間入，山從雲上看。
鶯鷁命新羽，鶴子矯輕翰。
華景染芳思，投驂向夜殘。

邵守招同建守集郊寺

梵林披七桂，雲饌薦三芝。
慧照深留夜，瑤花半吐枝。
賞因空際遠，世自劫中移。
會可耽禪觀，無嫌歸去遲。

又

鳳野標僊鷲，祗園表大雄。
冥荃超象外，玄賞契寰中。
芳薜侵塔碧，丹芝入雨紅。
登筵晤明牧，分夜興難窮。

道中觀瀑

銀瀑掛峯巔，虹橋架綵煙。
光寒清入月，影

駃閱成川逾嶺驚空度穿崖訝自懸何從
塵思浣徒羨鶴衣濺

宿雙峯

青山寄芳夜浮客旅煙墟虎跡交林外猿
聲到枕餘漏從雲氣杳清入夢覓虛泛梗
驚何定自憐心所於

春望

垆郊春望溢鄉思渺丰茸鳥弄半成曲石
欹全化松雜花芳未辨曾景曠逾重漸向

瑤林外雲中立數峯

芳園歌贈平洲

芳園淡蕩春風裏碧沼盈盈湛新水徐看
洞溟入無滓鳧鷺拂浪翩翩起妍光欸曲
誰爲來芙蓉亭畔天桃開煙景娛人幾相
醉對面嬌絲況千墜紅映金嬰間飛翠睨
睨流禽弄聲碎披襟散賞臨春臺却思行
樂真堪哀少年自負洛陽才何言飄泊等
浮埃三月韶光照江草過眼繁華豈再好

提携玉樽就君倒結交不在相逢早君今
意氣被花惱清瀾十丈空懷抱予亦悽心
隙漠間俗情於我從風掃出入五煙更好
道流浪無當薄馳藻藜宮芝館期君游疑
義奇文恣幽討

送興守遷備嘉湖

勝畧攬英髦兵鈴受玉韜海人思未厭越
嶠政仍操氣已無氛沴威行靜驛騷獨憐
青嶂外千里望旌旄

法雲寺

春寺入煙霄珍霞動澗標峯閑雲貌逸苔
染石顏嬌天勢開蒼鏡山冠擁翠翹晚來
風稍急應是海神朝

佛閣

飛閣瞰千尋籐蘿歲月侵窓中涵海色琴
裏寫猿吟十地觀初覺三條望逾深一憑
慈願力爲證未來心

次韻答理山見寄言別之作

年來踪跡任流離歲宴逢君釋我私暫
遊生平猶逮憶因之游好得無思南征
懷抱知何盡西笑風流復幾時忽枉行
人惠豐藻一憑高詠當交頤

雨中謁九仙觀禮火神也

霧磴四山埋登臨亦自住洞花疏玉觀
澗草灑香堦浮雨玄鑪秘飛雲仙馭排
儼如煙五色靈祀禮虛懷

偶題

憑憑雲氣一言收時復微吟用浣愁不
學徐凝與張祐直將千首較封侯



國家圖書館, NATIONAL CENTRAL LIBRARY, TAIWAN, R.O.C.



客建集卷之二

幽懷

瀟灑道吾真不知原憲貧風亭下游鶴雲
徑集閑賓石伐泉應躍蘭齊佩可仍何須
傷婞直會已欲潛淪

又

憑軾學干秦彌年望洛塵竒謀今不用弃
梗復何神園樹休啼烏先生欲掛鶉閑思
垂獨蠶那可引沉鱗

又

茂林山鳥巢脩竹澗風交朝綆携罌汲晨
炊就石敲悅生惟種樹開徑漸誅茅道士
希來問新蒲時解包

又

有客擁琴過自言能楚歌夏雲清韻疊幽
谷苦音多倚曲斜吹竹開樽半卷荷邴生
風未遠相揖此山阿

又

心跡雙沉寂葵榴訝許開森疎巖木秀
莽洞雲頽飼鹿還相狎呼禽已不猜履綦
情自緬庭戶任青苔

又

石瀨雨聲中當窓清夏風屏氛耽茂草高
卧任飛蓬戶列溪山碧墉疎木槿紅自然
能取適延目謝人功

又

獨醒常異賞松下坐來忘命義誰相領探

玄幸自商每希談士塵空羨令君香施尹
終難值伊懷孰所詳

又

弱年羞特操通籍預金閨結費違時損招
蘇豈道睽已經逢曠蕩况復藉媒梯何事
難羈繼長懷抱鹿麕

寶劍

昨夜鶉膏拭練文劍花飛雪灑千群持將
光影清遠水不信東南有惡氛

又

霜鐔倒吐掣流泉氣徹青天影照蓮截取
長鯨超翰海書將名字勒燕然

平臺集

脩竹標真可清風飄遠心如英舉翠萼窺
液攬青林雨洗山容溢煙藏夏氣深解纓
情志散欣此對鳴禽

又

散髮任朝醒酣情適美并疎松顏更苦幽

草色俱輕澤氣蒸虛袂山雲落畫屏仰尋
興遠思採藻激波清

芳蘭荅袁丈

芳蘭吐妍姿托根君子墀芬馨清暉被照
燭鮮雲滋結佩婉餘惠儷曲有遺思胡爲
懷往路愴愴心以悲

又

蘭生本幽遠隨風聞君堂承君惠微賤取
置雜衆芳郁烈幸可薦焚灼不敢傷申椒

忽遙奪回顧戀寒鄉

齋中

子雲良自苦元叔亦應疎戲謔觀今古談
諧視毀譽寡營情旣達無欲抱堪攄披覽
聊怡悅清言時啓予

訊憶盧生

旅寄青山遠離懷日以新蘭枝頻倚夢柳
色尚驚塵風駟應何地雲鴻復此晨會知
隨計早題賦報情親

次韻荅平洲見贈

悵予神慮淡托興在田廬默御調禽術閒
將掛犢書面江開石竇倚阜卧雲居曾是
矜高尚無才本愧樗

又

將子能憐我裁詩訊野廬佃漁親坂壠懷
抱閱方書問道庚桑楚招尋陶隱居空驚
匠石顧櫛液笑材樗

又

晚情微有悟孤景宴林廬黃石留丹篆赤
松將素書樹園鄰桂苑移竹遶蓬居不必
憐遺棄清陰亦籍樗

又

世事因頽靡冥心寄石廬洞花飛入詠野
鳥下啣書松桂招長往雲煙遯索居枵然
還自誚遲暮幸同樗

三山行

負海依山控險重連峯萬仞削芙蓉漣池

粳稻饒千廩沙汭珍羞列庶饗孔翠翩翩
飛絳荔珠胎隱隱映青榕甌東自昔稱深
阻空霧朝來接四封

偶題

回首稽山悵望中五噫歸去憶梁鴻不慚
同負幽人操自愍空將烈士風矯志欲隨
時共晦縱心誰恤道將窮爰尋遺跡追賢
尚雲外霞間桂有叢

夏日平洲過談

清庭泛景暄詩卷過高軒荔子吹香遍藤
花入座繁探懷孤論洽興玩兩情溫千載
還今夕渾消一晤言

又

綠陰吟思苦碧檻客來凭跡異方中侶書
非世所稱無猜情若邈相視色俱凝鳥亦
何相狎忘機下自能

再次平洲韻

翩翩游宦子塵外結蘅廬屑桂窮方術餐

芝讀道書了知心不繫已爾跡何居俯仰
辭天伐神全豈謝樗

讀蔡林屋集二首

誰携新詠草堂閑不覺長吟一破顏詩思
正愁消白日吏情行欲付青山却觀豐蔚
曾聞憶更惜迢遶隔共攀喜自清才題賦
後願言齊契晤懷間

又

四始從知日每耽九淵曾試夜珠探最憐

句向愁邊得獨許微能象外叅近代誰言
詩品絕昔時人擬梵乘三小齋淪茗清殘
夢喚取陰何較一談

憶濠上林亭

繞院桐陰覆片蓮檀欒修竹倚窓前花留
笑靨清香在鳥學歌聲藻思傳夢裏池塘
雲半鎖望中氛侵象猶懸何時霧洗鄉關
出把酒凭高一泫然

又

閑倚時風惜夏涼
啓扉清笑落山光
雲迷故國寬千里
樹擁疎寮綠半牀
蘿逕別來猿自憶
苔堦立處鶴相望
從知豐草幽林外
驚燕飛花思正長

貶謫既久轉望悽然

瘴嶺長流恩未收
芸編蠹粉此淹留
荷薰澤氣情如醉
柳織溪煙思若抽
虛館雲生襟袖濕
蒼江月出夢魂浮
幾回立盡天邊信
豈有相聞特訪幽

卧病

卧病清晝損樛容
無那醒醒似酒濃
山鳥何曾諳僻性
澗花應亦笑疎慵
消聲卽此求靈草
晦跡從教倚茂松
未用便尋勾漏去
秦時壇在幔亭峯

又

閑尋丹籙檢書籤
更發圓神試一占
欲就靈氛商出處
難逢季主問幽潛
課虛惟恨才無效
糜廩終慚願不兼
謾說懷仙欲長

往誤恩十載竟成淹

夏日寓懷

滿目傷心嶺海涯無端生事慢吁嗟年隨
水逝飛榕葉願與時零落槿花遙裔鶴煙
人獨往森疎雞樹境無譁怪來袖有青葭
色雲起湘源故國遮

木香亭

滿架輕絲颺綠煙芳條冉冉闌織妍舞殘
翠袖渾無力不是花時也自憐

夏日過平洲池亭

曲逕飛枝花迸新百重芳色灑清津臨風
遠寄渾無語映竹閑吟別有人久已委懷
堪解帶誰言携賞更沾巾驚塵荏苒音書
外煙草吳宮可自論

雨

迥野重雲鎖夕霏連空浮潤擁荆扉幾層
煙積遙村隱數點鷗輕去影微聲碎梧桐
閒院寂水深楊柳渡人稀聊因夜後連牀

語耐可沾殘游子衣

夜坐

橫琴小閣興堪憑幽坐清霄思轉增耿耿
孤懷隨韻寫沉沉無語托詩稱蕭條久附
遺榮戒徙倚何慚作賦能終擬獨尋巖壑
在知人誰復是孫登

午日

條達雙懸麗五辰紈綃備擬闢芳新沐蘭
聊復徵餘俗採艾空令憶放臣夏氣浮軒

清越簾花光映戶濕香巾從教菖葉長留
景無事鳴蜩欲報人

題方氏園

衆芳亭

曜綠舒紅映雜芳含姿弄態繞迴塘繽紛
笑出千花側歷亂開從百鳥傍面面風霞
生綺思曾曾煙景蕩流光幽亭構向塵寰
外惟許鶯來寄一觴

聽鶯閣

葉裏新聲曉閣青窓中柳色度泠泠冶情
晝倚和風弄春韻煙含細雨聽爲喚花魂
嬌欲醉催將蝶夢睡初醒幾回把酒凭欄
罷芳景林深日已暝

會心處

舊種疎篁已拂煙肆形泉石共超然持將
林意醒塵夢邀取花神續麗篇象外悠悠
堪自適區中文汶不須憐坐來寓目涵名
理靜契風光得性全

釣石

青波翠岸映江蘅卧柳飛花照水清鯨動
石鱗蒼蘚滑鳥驚橋影釣磯橫浮光欲蕩
雲生葉輕浪微吹月有聲却笑詹何策荆
篠垂綸百仞自無情

林扉

雲開三逕柳依依空設柴關鎖夕暉爲惜
落英常不掃欲留餘蕊恐教飛從知問字
人來扣已自題門客到稀獨怪林間多鳥

跡松樞夜半鶴爭歸

為平洲題

輕煙淡掃水悠悠碧色新齊杜若洲目盡
露華平似掌鏡開雲影疾如流插籬已迓
陶彭澤闢逕還迎許遠遊為問梁園辭賦
客總輸豐草得淹留

積雨齋中

閒庭積日常陰綠樹圍將雨氣沉幽映
半軒溽暑失青滋一曲莓苔深彈琴向鶴

雲自散酌酒與花愁不侵松翠可餐欲辟
穀不驚空水照塵心

醉後歌

雨中朱子招携二三子同遊開
元寺

煙寺登携將酒俱誰招傲兀青霞徒積雨
閉門已累日不覺溜水盈長衢蒸雲擁巨
恍蒼漭山氣入望川原無我今正爾心鬱
紆意氣不愜齊門竿安能悒悒事升斗何

事少年嘗棄繻相與酣歌戀佛圖聊復永
日臨樗蒲一觴在手坐歎息翻令浩蕩懷
江湖憶昨失意兔園竹至今愁說淄官梧
有酒但令細斟酌縱飲不受形骸拘紛紛
爾曹且隨我世情無若黃公壚若使葡萄
千日醉絕勝朱輪驅畏途

寓懷

苦將秋髮客紅塵歲晚猶爲岐路人目下
交游空有夢南中風土自相親文章總得

窮愁力世事兼忘羈旅身莫道徬徨心易
盡須知感慨意何申

又

問予何意在江津奄忽風波復此晨感激
易滋今古恨踟躕還作死生人鶯花節候
爲歡少霧雨煙霄悵望頻自是路長無羽
翼從教目斷洛京塵

放歌行爲陳子賦

君家本住閬闔西路當五劇交輪蹄畫橋

曲水臨門映綠樹青山入戶低鶴蓋朝游
簪赤玉雕軒留醉簞文犀射雉場臨香草
合啼鶯路遶百花迷博徒詞客相携來豪
呼大是縱橫才氣節竒高文采盛意悲心
遠形神開一字千金動驚絕思致不下青
陵臺有時同散蒼苔屐手攬六著呼五白
墮幘盤旋叫不已生事何曾掛擔石爾來
流蕩杳無跡日暮昏昏不自懌木田去後
應蕪菜芝榻雖在多堪哀格上藤侵亂書

帙門前客散空樽罌強復栖栖何所如棄
之猶得從吾初遠尋名岳訪仙駕學鍊丹
砂向石廬路逢道士相問訊一言空我萬
卷書

偶題

凌霜骨氣思多奇游霧清言藻自摛振俗
總令驚別構異時直欲讓新規高才輝映
千金賦妙義無過一尺捶篤論質文參往
代浩如江海趣難窺

霽

初日霽高城心將耳目明
齋閒幽寄僻思苦讀書情
深樹涵窓綠崇蘭隱几清
風兼餘韻發默坐快平生

夏霽

半嶺雲歸映雨餘青蘿煙濕鳥飛初
清光乍落添山翠新暑才流覺枕虛
晴送綠陰搖碧幌風將花影亂交疏
閒居事事堪惆悵獨喜無爲得宴知

夏日新霽過平洲園亭

煙餘蘋末下晴光
振屐言尋紫翠房
花影半堦閑院午
桐陰滿地小窓涼
試徼方術芝爲醴
共討靈書石作漿
頻此對君諸慮盡
榮名不似野情長

又

來探三徑百花明
非復悠悠世上情
松帶石煙臨暑淨
柳藏山氣入檐清
誰言數就携琴約
判不徒爲看竹行
信許炎氛能自

恣一聆深論已風生

訪林雲山秀才

題柱仙郎作賦才青槐掩映讀書臺當年
減刺空懷盡此日聞名躡履來壯思已隨
芳歲減歡情不覺向君開風流自古還相
惜莫道浮誇只浪猜

衆芳亭

野望四無雲天光復淨綠驚燕蹴流英新
鶯在修竹

藝槿軒

藝槿欲盈墀芳菲正在茲春風開幾度榮
悴與花知

方塘

琢翠開新沼青林飲鹿過飛花莫自點日
末已餘波

林扉

獨自掩荆關山猿拾果還空林人不見日
暮水潺潺

樾蔭

花光泫清露疎樾泛輕陰時有碧溪月來
照青苔深

江行見山上白雲

山色有無中飛煙杳靄通俄看舒復卷忽
漫聚還空纖弱那堪染輕楊只任籠自疑
神女出來逐大王風

同皇甫理山凌少里平遠臺眺望
鳳翼開形勢青山落几前四臨生海日一

俯鑒郊廛溪近潮聲接峰高野色懸如何
城郭裏別有壺中綠

又

清夏石林幽高臺諸景收巖光迎薄晚兩
色動先秋島嶼煙中辯帆檣天際浮此時
江海客同倚惜淹留

皇甫理山過予齋中

落落埋光意悠悠遁世情途窮猶仗氣漏
盡欲消聲忽聽精神訓能令心耳清金芽

行已化自可薄公卿

賦得寒樹晚蟬疎

高柳夕煙中鳴蜩葉影空露寒流斷韻翼
弱下疎風往候秋聲切殘枝晚色同堪憐
新雨後斜月在梧桐

賦得垂柳映斜溪

幽溪千仞清嬌柳復含情細葉隨流轉飛
枝逐浪輕風多全激石絮落半成萍不爲
留行色空教折更生

詠懷擬支道林

沉情寄澄漠逸志凌沖虛神理日遷化游
儀運不居懷哉緬靈壑超翰棲雲廬脩林
叶清氣玄圃滋神蔬仰漱欣流液俯映鑒
迴巢蕭條遠風集因之奮輕軀高步尋化
上抗首臨飛除道會冥無象歸損斥有餘
爲心一何散夙已情故祛聊因投照朗邈
與形散疎

又

寂寞望玄岳婉變親幽人棲遲日云促胡
爲尙風塵靈圖閔閔要操玩諒匪真披莊
澹無想詠老存谷神因用爲我御恍惚爲
我輪驅馳恣凌騁相與游無垠七聖野猶
迷却立令逡巡熙榮流萬象蔚若咸仰陳
遐志什長羅自樂與化新恢然寓天壤孰
言古有身

又

雲峯際芳霄石室眇何敞森竦薄迴泉神

九照晃朗游禽晝欲迷棲煙夕猶蕩芳芝
耀巖阿丹葩擢靈爽石孕金沙流精含洞
壑長激激飄風寒迢迢仙途仰中有無懷
人神游滅生想委翳層岫深容與崇霞上
頽形時兀然揮手任孤往沉凝尋化先悄
罔鄰人象廓矣懷若跡行將策吾杖指塗
暢寒墟悠哉謝塵網

長相思

長相思久離別去日音塵如雨絕花已飛

絮如雪庭寂晝偏沉翠寒香自結三春消
息疎萬里憂心愜
長相思久別離
銜啼何處寄征衣風已切
雁初歸調砧催落葉攬鏡減容輝
燈影散空帳寒聲入斷機

感懷

強復依依作放臣蓮花霜鏗暗流塵不平
最是登臨處雲裏關河夢裏身

有憶

萬里驅馳瘴癘鄉舊時情思半消亡
枕椰葉暗千山雨薜荔衣輕六月涼
憶處雁封猶恍惚傳來腥焰轉張皇
從教却望心徒切此日南還意叵量

夜坐

散吏空齋雨復清
淒風涼葉動秋聲
祇言晦迹還宜夜
無那牽情欲到明
永漏自懸鐙影散
疎砧偏傍砌蛩鳴
南浮數已憐時晚
天道何云尚發生

月
延月滿輕幃明河轉夜流清光不受暑涼
影故斜樓依露沾如濕盈墀湛若浮所嗟
含望意只自下城頭

齋中

急雨凌風氣似秋閒門深樹小庭幽禽來
自啄苔痕細葉落還依網戶留虛爽不知
催暑去淒清應自伴人愁拂衣未遂旋歸
計浮跡終憐汗漫游

夜坐

樓煙尚脩竹月色轉高窓露濯清庭迥風
飄墜影雙素暉寒靜夜哀響繞滄江何事
關河外思心照短缸

遣懷

遠意何能適閒來偶自縈風塵期抗跡巖
壑欲藏名鶴曳孤雲映林將返景明天長
秋氣瀉寒入薜衣驚寂夜鳴琴憶空齋墜
葉情關山若近遠歸夢一飄輕

野望

驛磴千尋隔暮山白雲愁望擁香關征蓬
盡處看江入寒雁來時共影還古榭荒煙
高仞落殘陽蕭景一林閑如何旅客腸俱
斷極目川原白慘顏

秋思

露濕寒塘落芰荷雨將秋色灑松蘿飄颻
度葉和風引慘唳驚鴻入夜過千緒自零
山水調單情誰慰越人歌氣清虛館神應
化迷跡塵踪奈爾何

又

寂聽寥寥萬籟空幻生真似夢菟中望分
煙色標林逕吹斷巖容下石叢沖境晚來
幽草積亂山秋入白雲同思心一夜隨江
月千里遙飛過嶺東

又

斷壑虹流殘雨明雲生幽澗擁飛楹風泉
樹裏虛清聽湖月霞間蕩遠情並去鷺閑

沙嶼出數來鷗狎岸帆輕秋榮何復含涼
色却憶前期暗自驚

又

清霄澄宇月臨關灑色空浮欲損顏卧視
秋河還耿耿却驚暗水更潺潺細思前事
常如醉總說平生半在山行卽滄洲訪漁
釣不妨踪跡尙塵寰

又

晴溪晃舫信歸風遙見雲墟出遠空秀木

陰疎涼葉下雜花芳滿夕原通水邊容
雙灘鴻石上婆娑數老翁世事但酬樵客
問逢人誰復說深衷

又

冥冥煙逕久忘筌偶寄微官但兀然松栝
任令遮路口芙蓉行已發江邊尋雲散涉
閒重榭洗藥逍遙咽細泉無取紛紜能自
外從知瀟落不堪憐

答皇甫年兄

偶自沾餘論清暉映座深同懷千里別相
對九愁侵飄泊知何定幽探慰共尋遂初
行有契曉色在西林

七夕

月露含涼氣星橋影夜流望應飛鳳駕歡
已逐龍翰雲幄遙今夕靈期悵昔秋還將
舊來意未可遽悠悠

又

輕雲斂夜扉新月下遙暉波瀉明河淺機

停曉策飛歡餘顧華寢恨不處重闈誰道
相逢易還同望未歸

又

含情脉脉向銀河流態盈盈拂絳波一夕
歡悰能幾許只應天上已秋多

七夕穿針詩

瑶席織雲映九光故穿雙縷動微芳衫輕
不任風來拂爲望天孫駐七襄
深憐流景下花陰映月嬌凝思不禁欲取

餘光曳飛縷爭誇纖指弄雙針

贈方平洲

世路方愁梗逢君冠古才道能鄰罔象辨
可析臺駘思劇吟多僻情高望每開芝香
仙井畔時想漱流來

憶吳中

石路拂塵衣迢迢驟使駢王孫殊可念公
子未應歸浪跡隨波蕩旌心逐影飛終知
會稽市賣藥信長違

寓懷

蘿院清陰午夢醒石淙松壑散泠泠紫藤
翳澗荒幽徑蒼石含煙倚曲亭羈客從教
傷草露野人徒自美芹萍秋光水上搖精
魄鴻引高天未忍聽

別朱子

世路逢君未息機幾回相見總依依忽驚
別緒秋初入漫憶前時夢欲飛况是風波
愁枳棘更堪塵鞅落容輝渺予從此音書

外海上雲深鴈到稀

別省署

浮飄蹤跡竟何言
臨路踟躕鳥亦喧
故館尚憐休睡井
舊巢猶在自知門
繕完遍識如初至
周覽知予未始存
苔逕春還無限意
獨教芳草憶王孫

理山年兄招遊莆之南寺

遠尋上巖石
解鞍憩山棲
疎林轉清曠
危雲墮蒼梯
氣深延景夕
峯密使逕迷
宮殿

生空際鐘梵發
天倪俯視見晴翠
仰眺驚華題淨理
了可契勝地
聊共躋洞覽
附禪觀沉冥
寄幽溪游目恬
自愜晚心諒
所齋秋色何從來
忽聞哀猿啼
相與窅窮達
吾道在醯雞

理山招飲廣化寺作

秋色在松際
薄雲延近關
苔深人境寂
谷宵夜琴閑
泉可醒塵聽
池堪發苦顏
幾年渾浪值
莫自惜時攀

次理山客思

旅世嗟何促長游悵短生情深秋自急思
苦月逾明物序雲鴻引悲歌桂樹行遲君
求大藥終擬九還成

試院詠懷

靜院還清夕高秋此閉關斜河隨幔卷流
月映帷閑景色堪生思霜華暗損顏不知
違世者何事尚塵寰

與理山共話

飄浮何所托深論究平生解綬期清曠
霞薄世情會言風尚異冀此達觀并若復
從禽向因之羽翰成

韶溪行

晴溪煙盡望初開海上秋深雁未來無那
鄉心與愁思不堪回首越王臺

酬理山途中

狹浦虛煙映澗雲依微山逕曙初分風兼
海氣嘗疑雨林翳陰霞半未曛地暖不驚

芳候晚秋深猶見雜花芬東南况是逢陽
九無那登臨思逸羣

閑適

客路頻爲感閑居歲已深松風盈短牖蘿
月伴孤琴托想起無際沉情契獨尋怪來
啼鳥寂庭院下秋陰

理山過予

棲遲逢暮序清論此中閑時菊猶盈砌秋
雲欲滿山愁邊爲客久醉裏問君還共有

蕭然意相看一破顏

秋日出城南

海氣臨清霽山雲無數歸林殘將暮色秋
在欲斜暉跡已隨游放心寧知是非羣青
何不下莫道未忘機

重與理山至南山寺

雲逕秋重至山扉月正開翠滋松葉酒緒
繞菊花杯梵宇千崖出泉聲半壑來幾回
同命賞浮跡不堪哀

香閣依雲半旃林帶澗平夕光仍暗草清
露尚秋英不慳長煙色空憐落日情如何
觴詠後未遣九愁輕

又
與理山遊烏石山寺

暫假登臨興同尋八桂林澗知棲鷓意山
識採芝心簷外峰爭倚松間月自深忽驚
盤石上還動越人吟

又

晚意誰將適閑懷試歷探秋泉鳴乳竇寒
鳥下精藍露滴曇枝吐風香藻影含此中
談妙諦華雨遍龍龕

晚出近郊

短策驅秋甸長林半夕曛城臨千里色石
抱一丘雲野意饒溪樹幽香襲澗芬翩翩
人外想寧復此爲羣

又

蕙路轉松岑煙光冒水潯沙虛江宛宛渚

淨暮沉沉涼葉依林照寒聲隔澗磯蕭條
時極目無柰紫芳心

客建集卷之二

客建集卷之二

與理山言別

明月懸江樹，離心半夜鴻。
共愁年鬢改，深念歲陰空。
枝晚依殘露，庭幽曠遠風。
欲知從此憶，俱是夢魂中。

同理山訪九鯉山作

詰朝事凌緬，懸裝信晨風。
迥涉出人境，指途半煙空。
傾崖發斜景，絕壑散幽淙。
仰聆旣驚急，近睇亦玲瓏。
因依蔽曾岫，映蔚舍

羣峯憩深摘疎華沿流蔭長松共以物外
想覽茲意彌重去人邈何遠仙理竟誰通
覽九鯉湖夜宿仙館

爾我薄游者曾非樂城市朝策務遐尋危
嶠步幽趾陰生巒氣深林映丹滋被懸溜
蕩鮮飈飛崖激清泚傾聽恍精鬼緬望悅
神理既以滌繁喧會可毓靈土潭洞邇星
漢霧壁垂煙埃落景青冥中月月長霞裏
晨夕非一形氣候乃相似永懷棲遯情興

此攝生旨赤鯉倘可乘超騰謝浮詭

覽鯉湖珠泉

谷館卽玄樓滌髓漱丹液潛似沉痾去恍
然塵霧釋攀崖肆窺臨苔洞振雲屐高岑
入重漢迸水下千尺泫泫幕輕綃霏霏濺
驚石紛疑散瓊蘂淨可匹珪璧氣深寒霰
零霜空露華白金膏蘊珍怪玉竦測泉脉
自昔伏修靈允惟集羽客乘茲清響哀重
以竒心適方希乳穴前一整飛霞術丈人

倘歸來千秋隱仙籍

皇甫子以高世之才邁往之韻而與劉子淪跡州郡流落江海暇日相與尋幽縱目探奇長覽適鄉人潘子作令仙遊乃從佐車爰造九鯉人景之勝備極一時可謂溪山之逢而曠代之賞矣於是皇甫子倡爲四詠劉子繼之夫感之者跡旣與化而逍遙遇之者神輒撫心而太息投荒萬里去國九千仰長風而凌

厲思整羽而清浮雖結餘歡於俄傾不能塞悲涕於悵然有不奮衽興歎攘袂慷慨者哉旣而初月流波半生海色葉墜綠而沙禽驚猿哀引而凄風應俛仰之間遂成千載醉後命管以映方來

莆郡感懷

羽檄交吳會烽煙更海濱時平寧識戰事起欲沾巾淹薄方無日艱難復此晨請纓雖有願功業與何人

又
宦薄成何意愁深屬有思美名神理忌高
調俗間疑寧惜鋒虞折終知素易緇即看
兵滿眼誰復係安危

憶理山

別來方少日為憶遂經時不道俄成隔終
知未可期無端勞夢寐何以慰衰遲惟有
登臨處長吟寄遠詩

滄峽舟中時勸夷寇事

殘葭衰隴不堪憐寒水迢迢入歲偏陰霧
晝沉渾作雨青山瘴合盡成煙哀猿自應
灘聲落孤旅曾無鴈素傳烽火祇今勞斥
埃夢蒐千里共悽然

又

亂山無盡片帆前殘日荒途重惓然江勢
縈紆爭自險浪文傾仄不成圓風塵未已
堪驚骨懷抱無聊欲扣舷顧盼島夷須係
虜誰言開霽意空筌

莆郡紀事五首

海畔驚塵夜半飛，俄傳列校鬪兵稀。
蒼黃遍野愁奔避，式遏何人駭疾機。
常笑鳴鞘凌氣勢，可堪臨敵挫英威。
剪屠幸未遭殘孽，宵潰還逢戎馬歸。
時寇臨城而退

又

始戒車徒事薄征，將軍授鉞欲橫行。
援袍凌陣鋒初接，注刃鳴弓氣已生。
盡道勲應疏爵邑，寧知天亦忌功名。
不須惆悵寒原

暮一劔由來視死輕

丘白二將相繼效節

又

滔寇憑凌勢愈張，誰操長矢射天狼。
山當戰苦雲長白，馬渡沙深日倍黃。
組練竟川猶負險，樓船被海未應妨。
不知何意驕夷醜，莫漫傷殘恃犬羊。

又

至日誓師申五伐，先時合戰意何盈。
遷延二廣徐觀釁，踴躍中軍獨抗旌。
憑怒再交

爭叩壘亟麾不待失先鳴陰風颯颯天時
懟死士翩翩姓字榮

傷童將軍

又

阻兵應已屬殲夷崇亂空憐遂積時自是
餘氛猶未厭非關制勝總無奇悲歌壯氣
堪投袂談笑名王欲請羈不分民勞行轉
甚持將雄劍倚安危

夜過楊氏館兼憶理山

自是平生負氣多還於趙李數經過酒酣

身世同慷慨韻遶絲桐憶笑歌馬色曉
猶瘴霧簡書冬盡况干戈堪憐飄泊悲徒
侶總有青尊奈爾何

又

憑軾年來意向闌感時猶復強爲歡嚴風
欲振江光冽輕霰纔開荔色寒閑館張鐙
欣自慰清琴懷憶醉相看與君計別頻經
月北望雲山獨寤歎

軍中

海曲連營盡設竒陰風獵獵漢旌旗威侵
胡月星芒落殺重邊城鼓角悲慘淡煙光
寒玉節模糊戰血染金羈封侯應是將軍
事辛苦沙場征戍兒

塞下

忽見蓬飛心自驚五原寒日下孤城黃塵
千里無行旅黑祲三時有戰爭候月輕兵
防近塞射生精騎出前營堪憐織錦秦家
婦猶問交河路幾程

又

少年投筆事功名捕虜稽山每在行馬上
鞶囊經月解陣前金鎖帶星明雲平沙塞
孤煙直雪盡關河白羽輕見說偏裨皆已
貴羞看玉劍老長征

郡齋冬盡

郡閣當山映雨餘寂寥清聽入風虛年光
幾謝心能在霜氣渾輕髮半疎閒院松間
歸去夢故人江上寄來書相思併在瓊枝

裏却笑鄒陽尚曳裾

得平洲書因寄

滿座凝塵晝掩關竹聲風灑落池灣舊時
琴酒方懷憶此日音華漫啓顏道韻獨看
霜後遠法筵誰共石邊攀因書寄與當揮
涕疎蘂寒煙正在山

又

堪哀踪跡重平生老向交游更有情滿逕
清霜邀月色半山枯葉送寒聲林端鳥散

雲孤映海畔鴻來思暗驚與報故人今好
在新詩莫遺負時名

江邊

築室江邊一隱淪紅塵不到四無鄰看雲
獨自過山麓理釣閑行向水濱遶院梨花
清午夢扣關風雨悅心神晚耽清淨綜名
理世外悠悠托此身

又

仲蔚園林雨雪開孟公新釀客方來窓中

幽氣看花放樹裏清光入酒催形曠將迎
俱已廢情疎飛動了無猜支離幸免風塵
際浪跡休誇鳴鴈才

莆郡作

細思拙宦十年餘夢裏升沉一枕虛詩對
郡樓孤嶼近花看官閣夕煙濡向南地濕
衣先覺入臘寒輕瘴未祛才薄調淹何所
恨空庭課簡晚心疎

又

遠郡沉懷寄次寥日高山霧未全消霜隨
候與寒枝發心共年將晚髮凋臨路振衣
懸促景倚闌看劍徹中霄從知騁跡羞跬
步長轡何時萬里遙

吳質云步武之間不足以騁跡

又

寒煙不徹抱重關獨鶴堦前弄影閒座裏
蘭坡還入思窓中壺嶠忽開顏霜侵荔色
軒墀綠雨映巖光蘚石班資理愧無酬淺
薄氤氳空自滿仙山

又
天窮海岸渾煙雨地儉民勞自土風作苦
總教歸里右相傾猶復雜華戎嚴生祇憶
承明寵張敞能懷劇郡雄莫道淹翔應忝
切空驚謫宦走西東

擬興慶池侍宴應制

蘭池翠鑿浸流霞淑氣先開御苑花水映
樓臺千丈寫煙圖城闕百重遮黃魚出躍
芳菲並青鳥飛迎瑞靄斜日暮未窮歡賞

事競將春藻荅恩華

擬奉和初春幸太平公主南莊應
制

宸蹕春游拂紫煙主家山第鑑青川雲連
羽騎分花映風轉鶯歌隔澗傳日彩通霄
留輦住星光徹曉借珠懸微臣幸忝巡遊
後願逐陽阿入舜絃

擬奉和立春游花苑迎春

鸞旗宛轉出花津龍節迢遙候氣新露拂

青枝籠瑞蹕煙開紅苑穆芳塵皇情睿賞
流爲澤聖藻恩輝併是春不覺陽和行已
遍政隨時令布深仁

擬和立春日內出采花樹

禁籞春歸散彩煙內庭芳色動韶年風前
尚覺青苔隱月裏先開絳藥妍香縷學將
鶯並語繁枝裁就蝶翩躚天工應與生成
共麗景分爲萬象先

擬紅樓苑應制

王舍城偏淨業長梵輪承日見毫光經從
劫後談真諦人向天中聞妙香寶樹玲瓏
丹闕下琳宮暉映赤霄傍自憐常得憑茲
力歲逐爐煙捧道場

擬嵩山石淙侍宴應制

霧歛丹梯映彩旂星懸雲旆轉朱樓池邊
雜吹聲逾冷樹裏清絃韻更幽流景四連
宸幄近風光盡入御筵收承恩不羨東觀
洛式宴還同汾水游

擬皇甫冉四首又二首

酬李補闕

幾年征馬路空長
千里歸人意自傷
直上聽殘花外漏
朝回携得案前香
何時鶴嶺隨鴻遠
此日鸞臺逐鳳翔
未有從容酬獻納
佩聲風度繞斜廊

送錢塘路少府赴制

詔赴都門別自難
離懷酒上詎能寬
雲交極浦空煙在
雪擁荒途野日殘
秦塞二肴

經欲遍漢庭三策
奏應看懸知清近
稱榮遇共許青霄罄
羽翰

秋夕寄懷契上人

鳥散秋齋清夕淺
鶴鳴淒露憶鴻羣
心游空際澄非想
觀入無生焰不焚
竹外名香平諍論
林端孤磬息聲聞
寒雲定後棲禪衲
多少壇前法雨紛

送李錄事赴饒州

南雲立盡送離鞍
樽酒相携寄舊歡
汀雪

未分隨雁遠渚煙不斷泛江寒天連蠡水
波無際路到匡山月向殘年少翩翩誰得
似帳中籌畫借君看

使往壽州淮路寄劉長卿

蕭條平莽接寒蕪野水空連照影孤樹擁
歸雲迷遠岫煙生疎薄帶長湖楚天霽色
全憑雁淮岸秋聲半是蘆極目鄉關那可
望故人今夜憶來無

張芬見訪郊居作

雨催煙景散林端遂有風來深樹寒病葉
驚秋情落莫衰年對客意盤桓時光已逐
蟬聲暮身世堪悲蕙草殘若向青山尋白
社切須卜築共江干

擬李嘉祐

同皇甫冉登重玄閣

延閣逶迤入漢重青煙古岸見江東霜臯
露渚寒生色越榜吳榔夕起風天際漸看
雲去黑海邊猶帶日歸紅幾年作客腸俱

斷野曠山低悵望中

宋州東望題武陵驛

亂後川原水自悽流禽日暮莫深啼花開
廢苑人經少雨暗荒臺草長齊禾黍惟餘
丘隴在荆榛偏帶野煙低傷心黎庶方波
蕩無那秋風尙鼓鼙

蘇臺至望亭驛人家盡空悵然有

作寄從弟

山將斜日在煙藩吳地干戈歲益煩水上

人家堪墮淚苑中麋鹿自傷菟寒聲斷
兼風慘樹色空村帶雨昏最是夜來鄉土
夢吁嗟生事欲何論

早秋京口旅泊酬張侍御

飄零涕淚滿衣裳見說江南盡可傷舊日
豪華應總廢近時消息半凋亡秋來月自
生池館戰後花猶落野塘欲問窮愁何所
托偏驚塵鬢怯清霜

送宋中舍游江東

吳洲一望虜塵空
征馬蕭蕭路向東
竹裏泉聲猶帶雪
江邊蘆葉况多風
影閑獨立清潭鷺
沙淨徐來極浦鴻
若弔前朝傷往事
教人淚盡夕煙中

暮春宜陽郡齋愁坐忽枉劉七侍
御詩因以酬荅

水市煙光動白蘋
他鄉春色倍傷神
風和鳥弄還催暮
月映花開祇待人
客到衡陽魂易斷
愁來湘水鬢驚新
憐君持法方爲

吏猶自裁詩寄密親

送皇甫冉往安宜

晚來江上白雲重
君向長淮煙水空
草覆細泉綠岸綠
花藏別塢映堤紅
山城野市餘殘照
楚館隋宮落晚風
休問廢興當日事
獨看楊柳思無窮

擬奉和幸興慶池競度應制

仙蹕初傳出翠微
緹宮相映接青圻
翳潭花霧沾衣潤
飲澗晴虹帶鷁飛
衆果風來

爭澹蕩輕荷蓋轉落芳菲濟川已見掄才
備猶欲疇咨訪釣磯

擬奉和初春幸太平公主南莊應
制

皇女瑤壇碧嶺開上陽巡幸玉輿來圖花
寫霧移雲棟鑿月裁星布羽臺空裏吹蕭
和鳳曲筵前小史是仙才風光不伴遙添
酒日暮歡情未擬回

擬王維

和溫泉寄目

君王新構集靈臺別有仙源翠鑿開巖幌
自驚真氣在林霏常帶彩煙來朝聞羽吹
雲中度夜聽霓裳月下迴今日朝廷待枚
馬侍臣誰是洛陽才

酬郭給事

春雲不散掖垣深日轉長廊翠陛陰仙閣
餘香消視草瑣闥清漏對微吟花間曉奉
金輿度池上晨趨玉佩沉無那襟情付流

水閑於同調得相尋

早秋中山作

早來思欲遂初衣久向紛華已息機
衰謝任令人事簡棲遲惟恐鬢毛非
臨流默坐觀魚樂薄暮閒行羨鳥歸
更愛風幽門不掩待教月上扣林扉

積雨輞川作

林逕煙深積雨時滿村催喚事春犁
杏花半落雲連樹菖葉纔齊水映堤
清暵回風

開意適平疇挈杖慰情遲
因從野老知禾稼自與羣青更有期

過乘世禪師蕭居士嵩居蘭若

物外蕭然碧院晴嵩峯夕氣案間清
坐窺名相三衣裂靜業阿含八解生
忍草覆堦從禁跡覺花塗砌落無聲
遙知空色聊酬對却顧雲山豈有情

春日同裴迪過新昌里訪裴逸人

不遇

古松壇下訪君家行到花源綠樹遮欲問
荷蓑何處去不知浮跡自堪嗟園香競向
人衣染林靄紛從石磴斜何必武陵能隱
世且尋愚谷學餐霞

苑舍人能書梵字兼達梵音皆曲
盡其妙戲爲之詠

西禁雍雍冠世才憐君妙解獨相推
呿盧文字從河注鑠腹雄談若嶺摧
聞昔勝游希梵什祇今待詔有鄒枚
凌雲辭賦看題

遍莫戀旃檀法苑開

擬李頎二首

題璿公山池

結廬松頂俯幽岑暮色纔通一徑陰
祇樹超禪經是葉靈花證果法爲林
堦前空水無名欲江上青山悟道心
若問遠公何所業惟於定後見光音

送魏萬之京

丈夫影劒事游遨拂袂誰能涕泗勞
北去

關長多雨雪晚來河急况風濤曙烏欲動
知寒在苑樹遙分覺霧高莫為京華更留
滯直將年歲負春臯

擬孟浩然二首

登安陽城樓

縣郭開從水上頭楚中風物思悠悠相將
暇日春堪望無那連天江自流歌管漫須
澄暮景雲霞偏欲霽滄洲波心向夕搖明
月人世清疑鏡裏遊

望萬歲樓

登樓不覺思徬徨欲望鄉關道路長沙映
細流明遠岸鴻驚落葉帶斜陽千家霜月
催砧杵萬里雲空斷客腸祇恐別深人事
改書來且莫問行藏

擬張謂二首

別韋郎中

使旌明發向江干相顧茫然阻舊歡楚望
自隨重棧遠夷歌互與暮猿殘雨昏神女

詞前樹煙慘黃牛峽上灘萬里不堪驚此
別教人心盡對征鞍

杜侍御送貢物戲贈

粵裳歸義漫梯航底貢殊方喜化昌總爲
綏懷何用却由來柔遠自須將間關道路
愁中劇迢遞山川夢裏長聞道塗山陳玉
帛急隨夷昧赴鏘鏘

擬高適二首

送李少府

忽驚爲別意何長日暮停杯問驕驕灑灑
山青乏同旅瀟湘雲白少歸航峽長莫聽
啼猿切天遠空聞去鴈傷聖主從容應有
問未須惆悵弔滄浪

夜別韋司士

罷琴張酒話初分華燭蘭堂夜正殷清漏
不堪愁處滴哀鴻那復醉中聞黃蘆沙際
流殘葉青障天垂望斷雲欲擬送君流水
調卽看雙袖淚紛紛

莆陽迎春作

東郊迎氣屬芳辰道上青旂簇仗新草色
欲開猶隱綠柳煙纔動已含春直看雲物
回嘉節半拂調風散綺塵萬戶歡呼歌歲
穰農祥行喜遍甌閩

又

海濱春色隔年歸日霽時恬更有輝青氣
肇開方應律朱絃戒典始分衣韶光欲向
風前覓蘭氣先從酒上揮試奏雲和發陽

管幽林無處不芳菲

四園詩爲盧公賦

芝園並轉帶金塘月館星橋跨石梁瓊樹
半飛巖際影瑤花全吐曲中芳清光晚映
輕霞泛秀色朝看裊露香聞道蘇耽還種
藥悠然人境歲華長

又

別開芳榭枕巖阿更有青丘長薜蘿百丈
蒲萄縈翠蔓九飛鳴鵠遶長柯林篁駐日

能留舞石瀨臨風欲倚歌誰向此中消歲
月丹砂流處彩雲多

蒲萄鳴鵲皆古園名

又

荔浦蘅臯望越臺桂叢蘭砌向春開從教
攀葉玄猿嘯自有啣花翡翠來泉石會心
應在遠禽魚得意不相猜盧敖海上逍遙
日靈氣朝朝徹上台

又

掩靄羣芳積翠墀因依列岫照清池柳墻

松谷層層見蕙晚芝原一一披煙景四臨
皆煥發風花隨處總相宜但教笙鶴常來
往定取韶顏度世遲

擬十五夜御前踏歌詞

鴛鴦樓下萬花新翡翠宮前百戲陳天矯
翔龍嚼火樹飛來瑞鳳散芳春

又

仙蹕初傳紫禁香瑞雲開處夜花芳繁絃
促管昇平調綺綴丹蓮借月光

又

翠火雲中映紫微
虹橋百丈向空飛
天家春與人間異
瓊樹瑤山盡賜緋

擬涼洲詞

十五胡姬意自憐
杯持赤玉向君妍
教人不飲心先死
莫問功名瀚海邊

又

春至金河雪似花
蕭條玉塞但胡沙
曉來重上關城望
惟見驚塵不見家

又

新釀蒲萄泛紫霞
醉來馬上奏琵琶
頻年征戍空傷柳
何日歸期正及瓜

又

十蕩雄威玉劔寒
長矛飛鞚奮如湍
破虜新從海西曲
歸來高壘係呼韓

擬清平調詞

歛笑分紅瀉玉波
豔輕流月渡銀河
含情爭似人間見
應笑西施在苧羅

又

月中縹緲駕雙鸞雲裏輕綃翠黛寒誰向
仙臺領春色芙蓉醉倚玉欄干

又

閨苑春風幾許憐瓊宮花月兩重圓霞將
惠彩生流影獨倚嬌香得度前

春宮曲

流鶯春曉喚櫻桃花外傳呼殿影高抱裏
琵琶最承寵君王勅賜玉為槽

又

宮雲流靄泛初蘭鸚鵡前廊不忍看行過
曲亭花露重翠生雙袂怯春寒

秋思

桂殿含秋綠半飛淚流紅臉惜芳菲金瓊
露濕羅襦薄夜靜前庭待月輝

擬贈陌上美人

翠翹徐度七香車柳陌東頭是俠邪一笑
褰簾私自語春來淇上落情花

擬甘泉詞

法駕香雲從紫鸞
肅將嚴敬禮昭壇
占星太史重書瑞
朱露新凝赤玉盤

擬宴春源

水開長鏡引諸巒
春洞花深落翠寒
醉向綠蘿驚自醒
與君清耳聽松湍

擬寄穆侍御出幽州

臨路深懷放廢漸
夢中猶自憶江南
莫言塞北春風少
還勝炎荒入瘴嵐

擬送別魏二

橘花香覆綠蘋洲
江引輕帆入遠遊
常憶送君從此去
相思不敢復登樓

擬采蓮曲

粉光花色葉中開
荷氣衣香水上來
掉響清潭見斜領
雙鴛何事亦相猜

又

浦口潮生月上時
芙蓉繡舫出花遲
含情折得同根蒂
多恐芳華不自持

又

暗送清香入浦風蕩舟妖豔照江東欲將
玉面嬌花色故遣羅襦映水紅

偶題

鬼夢天南垂宿昔萬里道池臺花氣深到
處生春草

讀懷璧集愛之因和其韻

鹿塞烽煙百道馳雁門風色暗旌旗破圍
鐵騎長驅疾飲血將軍轉戰危畫角吹開

邊月靜縵纓不信虜塵窺歸來長揖功成
後黃石當年故有期

閒適

清室汎瑤琴微爲游子吟庭柯寒蔭落汀
雁夕烟深弱思辭侵慮幽音奏苦心山川
一留醉談笑倚長林

又

虛牖曉光盈交簷古樹平人非投壑隱跡
似激流清山月閑樽寫風泉雜吹輕憑軒

遙可對遐曠有餘情

偶題

閒尋水石眷巖阿拂地春風洽薜蘿怪底
夢竈香未已曉來衣上落英多

寄憶山中

桂樹平生親幽居蘭杜鄰雲標斜翠逕木
杪瀉清津葉淺欺閑鳥池平泳逸鱗餘花
將霧散流靄入煙新石倚寒爭落苔深綠
可紉澗疑牽水帶林自掛山中松液堪忘

世芝香學避人舍風虛有穴張日淨無塵
憶處頻開歲情來欲度春歡言期谷口思
發在河澗一許青巒氣終然寄隱淪

又

長吟重悒然爲憶山中年清瑟汎遙夜亂
花隨暮煙珠臯餘露氣乳竇滴香泉跡遠
塵喧外春開綺藻前巖籠雲貌逸竹抱水
容妍蕙磴飛英遶萍潭片影懸林藏諸曲
勝臺擅一峯偏野興時堪醉霞情獨可憐

碧壇尋寶篆丹洞講幽仙游霧才稱麗流
風思尚玄境忘渾似道景悟悉成禪會可
標真寄焚香禮石筵

別尋

別尋幽調向淒煙桂闕澄心事梵筵果願
若隨分衛後定看輪劫得賒年

擬王勃聖泉宴

煙磴披青靄風筵藉紫苔花香凌桂席竹
影落藤杯鳴瀨將歌遠飛枝拂舞開未愁

留興晚流月度雲來

丙辰元日

和風獻節曉光新瑞色芳雲及上春自喜
年華重履泰更欣物候總宜人海邊露冕
行青甸天上霞衣覲紫宸此日遙思陪率
舞願言長奉屬車塵

上元

蘭焰芳輝徹曉開珠光新靄映人來歌迎
甲夜催銀管影動繁星綴玉臺別有朱門

春澹蕩不妨芝火樹崔嵬此時月色同沾
醉何處游輪陌上回

春陰

谷曙靄虛陰江春石氣深窓文交野蔓簷
色繞煙林欲辯行藏意難分去住心惟應
窮鳥賦持此寄知音

江口作

分險架長瀾斜梁控夕巒宿雲依嶺斷初
月入江寒溜化秦裘弊塵驚漢策殘無言

倦行旅遙路屬時難

次蒜嶺

誰言行旅日况復桃花時水卽滄溟遠山
疑負嶠窺川光獨鳥暮林色落英遲豈是
王程急偏多游子悲

又

解鞍臨海岸夕憇卽山棲悵望啼猿處頻
經惜馬蹄澗流空歲月蓬跡任東西况以
青春獻愁懷醉裏題

榆溪道中

初日在斜溪山雲片片低鄉愁夢裏失馬
色望中迷澗底淒泉氣巖幽遍綠萸非關
秦塞去無事候晨雞

福清作

孤城向夕原春入景初暄綠樹低官舍青
山在縣門樓臺疑結蜃枕席更聞猿客路
何曾定棲遲欲黯魂

新嶺臨眺眷然有懷皇甫子

關勢遙臨海峯巒半入雲煙中獨鳥下潭
上雜花紛寄遠悲春草登臨憶使君此時
還極目離思正氤氳

卧病

卧病諸慮寂春鳥弄音饒漫道清言發誰
將晤語消風煙情可適人世醉能陶桂樹
無須賦淮南已見招

清曉

清曉意未愜卷簾時自吟檻虛花氣發池

煖竹煙深秀色還朝暮浮雲遂古今石泉
驚已躍會可洗幽心

幽軒

幽軒斜映山空澗復潺潺重疊巖巒趣遙
來窓戶間桃花飄岫幌越燕度松關衣桁
侵池翠堦痕積蘚班臨風清瑟奏對酒白
雲閒眷戀青春色如何客未還

讀大藏

澄慮無明觀投心法界寬幻生同夢覺淨

世在毫端舊識緣皆妄今知漏竟殘妙可
窺梵藏淨理戀旃檀朗旦風行被韋陀典
不刊如如真景現寂寂雙林寒且欲留餘
結非關證道難

春日郊游

步入桃園裏晴花更滿枝峯迴山意曠林
杳竹光遲遠寺尋雞末名香發鴈池閒能
將遠興况及上陽時

雨

簷際空槐雨偏令春氣幽屢尋苔逕濕時
見嶂雲流草長情難寄花含興自留風期
乖此日愁望強登樓

田家

黯黯日將夕牛羊村外來巖阿青氣發籬
落杏花開草木應何感鷓鴣亦已催晚聞
春作好行樂不須猜

題南山寺

春寺無人亂鳥啼藤蘿陰磴野僧迷雲藏

古壁遺龍象草沒香臺抱鹿麝松籟泠泠
疑梵唄柳煙歷歷見招提爲耽寂樂親禪
侶莫怪閑行費馬蹄

過月峯寺憶理山

共來江海上清夕一尊同禪榻渾依舊心
期浩已空驚春花灑樹聞梵澗生風二諦
欣咨啓還應夢寐通

雨晴

雨過雲低樹山青水滿陂晚煙花上濕欄

影石間危臨汎湖應闊沿流釣欲垂可憐
芳月夜不減習家池

過靈巖廣化寺

遐思鷺冲玄澄澄寄無象緬尋復何詣靜
域事孤賞風灑青松氣澗道含清響鹿圃
熙春華丰茸競升長芳芝修坂被珠樹琳
堦仰峻登轉寥邃面勢亦虎敞疎秀暢輕
質歲蕤耀精爽石室瞰翠空金光盼圓朗
旣惟大智人蕭條已神往沉俗迷情故投

身觸愛網逝將散余懷澹泊滅生想飛
息山隅十力猶可仗

游烏山寺

香刹懸青磴飛樓界碧空石門棲怖鴿慈
塔禮飯鴻漫欲窺初地誰能竟六通從來
樂幽寂尋覽未能窮

寄淳父

放跡疑辭垢棲心亦道門玄言蘿幌馥詩
思竹爐溫解帶縈花落彈琴散鳥喧江山

茲夕意惟有素交存

寄人

愛酒時稱癖懷情自不凡
向人方白眼違世有青巖
雲際開三徑煙中掛一帆
相期同歲晚閒興與松杉

寄所知

晴鳥弄春煙懷人獨黯然
題詩交款語酌酒韻清絃
莫以蒹葭倚還同管蒯
捐相望不可極流思邈山川

古意

夜分清月映羅幃風度流螢入
斷機雲母屏前蘭焰冷芙蓉
枕上夢君歸洞房秋思淚垂臆
花落相看惜顏色銀星欲貼臉長
嚙金縷裁縫手無力墜葉驚鴻
妾意傷新縑故素斷人腸當時鴛
錦茱萸氣昔日鸞衾芍藥芳
鏤玉連環香已暗盤龍明鏡照
無光長門不惜千金賦繡閣誰
禁五夜涼那得飄飄雲裏雁爲
嚙流恨到君傍

宴王水部

荔色俯香筵
蘭英浥紫泉
逸情催急管
飛緒響嬌絃
松脯山人薦
參花野女煎
興酣思彥國
達節轉須憐

重宴栢臺

華臺陳桂醕
密榭宴清真
栢葉猶霜氣
桃花似漢津
青樽照深夕
綠綺映芳春
欲憶相逢後
無言嶺海人

遣興

山窓閒卧午
紅藥逗寒餘
雨氣重羸疾
風期少報書
散懷垂柳外
醒耳細泉初
爲問長沙意
年來何自疎

寄林秀才

閉戶近如何
春松意况多
才章聞作誦
雅詠被爲歌
調遠幽成趣
神閒興欲酣
箋期王胡報
知憶在山阿

又

遠望極川陽
長林倒夕光
雲鴻翻欲逝
新

鳥盡來翔撫跡驚何定含情徒自芳臨風
欲有贈無使桂枝傷

與方生

故交行旅外遠復此相親寂館雲生枕清
庭月待扉薄游當歲晚授節已春衣自笑
風流在君看騎馬歸

又

煙草雨蕭蕭鶯花晚寂寥憶家憐淑景積
夢戀清宵尋義聊剛對言詩或意消平生

萬卷富時幸不須邀

重送王水部

蘭水漲寒汀城頭送使星
轡軒朝氣紫祖席晚峯青
一鳥雲間路孤煙江上舫
最憐攀送後寂寞返郊坰

春日齋居卽事

晚證無生理時尋不二門
法筵容禮鶴心路獨看猿
閑葉雲光落晴枝日影翻
芳菲對楊柳定久轉無言

又

悟懷非世教芳草自人間松梵宜臨夜花
跌欲住山春空風靄淡江色鳥飛閑但解
焚香坐渾忘客未還

登城樓作

井邑白雲間巖城遠帶山沙墟陰欲暮郊
色淡方閑孤逕迴榕岸層巒被枳關寥寥
分遠望暫得一開顏

幽庭

幽庭堪坐復堪行箇小低篁粉色輕隔院
綠楊時弄影絮飛殘雪泥鶯聲

用燈字爲韻暗持經者

無念空爲最一乘更教持誦復何稱三因
覺後還成果半偈聞來是法燈

又

齋心誦禮障能勝永夜分燈世界弘莫遣
六身消善業爲將一相問摩騰



國家圖書館, NATIONAL CENTRAL LIBRARY, TAIWAN, R.O.C.

不
以
建
集
卷
三

三
二
一

客建集卷之四

過城正西人

晴芳向晚散幽岑
青岸沿流愜近尋
斜度松梁飛紫燕
春風爲訪綠蘿心

郡中一首

異政表東海修名
墨循吏君子豈不
惠容與偶陪貳係
龜山水鄉幸顛淮
南治春風散平陸
熙然蕩情思遠瞰
滅浮輝滄波邈
何寄窮壑自南
傾廻嶼盡西歧
澹歛發長



震沉寂隱幽異薄泛凌空虛超忽隨所肆
新流彼澶漫林樾起清吹覽序頽形崖顧
已眷遐意及茲春暄景檐楹擢煙翠無使
心賞乖坐待涼颺至

擬王維濟州過趙叟家宴

境與塵氛絕六閒草樹餘閉門成遠趣涉
興卽幽居手一曠峯巒邈煙含松杞虛披莊
親道術抱朴展方書澗飲寒流潔山羞意
味疎列筵酣寂靜繁促悵何如

擬同賦青龍寺

寂境開蘭若巖堦物外躋迢遶窺世界天
矯貫虹霓慧照千燈出潮音衆鳥啼秦城
煙際眇藥樹檻前低趺坐談真諦塵中指
六迷

春祀

陳信禮虞庠芬香薦德芳嚴玄寅在位齋
栗祗求陽文舞登華翟清歌奏雅章神人
應愷樂流化感無方

送人督戍海上

青海動風埃英英戍將來氣陵關色壯義
激陣雲摧曉劍寒花發春旗翼影開鯨波
妖自剪豹略祕能該選士還超乘宣威得
異材卽看書竹帛會不讓登臺

閨人贈遠

曉漏曙銀釭朝花映玉窓莫驚棲鳥夢飛
起不成雙

又

丹花欲笑春青鏡暗生塵不省雙蛾翠
君長自嘖

又

塞上征人去陌頭楊柳催從教歸有日年
貌自應衰

又

鶯領綻花光燕梁巢綺翼雲空萬里長流
恨同無極

又

不分繡孤鸞誰禁形影單歡今知近遠獨
上蕙樓看

擬王維早秋山中作

獨將踈節任差池忽見流芳感歲時清尚
未嫌儒仲僻甘貧不受孝然遺雨中秋色
蛩鳴切煙際山光鳥去遲跡寄寥寥塵垢
外白雲相約訪安期

擬出塞作

弓嚮秋高塞馬驕沙虛風疾戰聲驍前擒

日逐疆場振直奪天山意氣饒南向旌旄
無牧馬朝來牙帳有鳴梟冠軍年少勲名
重看取麒麟閣上標

和質山游虞山六首

桃源澗

春空芳氣映人浮山霽初煙徹望流礪落
雲泉懸漢影林飛風沫灑龍湫露桃開謝
仙源近霧蹬攀綠洞壑幽峽裏不知時代
改問津猶擬是前劉

白龍祠祠有水簾洞瑞石

試披春嶺霧作禮達池龍
濺水空穿洞裁雲密作峯
輕明霏霽雪陰翠發寒松
歷礪探幽異花隨鹿女蹤

拂水巖

林標翠巘出烟層雲杪寒
飛百尺冰風架輕瀾光倒
沸石疏高浪影空憑綠崖
激激青冥濕入晝濛濛碧
靄凝一漱靈源心骨冷為
驚真界暫能登

維摩寺

景夕憩仁祠冲情暫可思
潮聲檀閣透山氣石門欺
供出天厨具經翻海藏披
空王初有願得就法筵窺

釜山觀日

海氣霽初晨雲濤動日輪
珠宮發瑤彩丹穴照龍鱗
近矚跋烏御何須若木津
倘逢童子問精鬼晃心神

福山大慈寺閣

丹壑迴環閣影臨羣峯森竦見雙林雁堂
龍霧幡幢濕雞寺鯨音法界深七淨梵居
迎海色十尋苔壁宿雲陰塵游獨悵鶯花
歲遠社空餘風雨心

似樓一首

崇榭俯山阿雲泉輝映多升霞照石壁攀
葉入煙蘿珍闕幽仙托靈期佇興過彌令
傾海岳暫得望星河

再次元夜同質山韻

芳夜散煙霏清庭興不違酒行蘭氣映燈
吐蕙光依一共憐華節相看照薜衣酬君
慚調下况及陽春歸

重次三月十四同質山登天池

清旦索仙區雲途翠嶺逾吟依川日淡賞
接島煙孤遠磻桃花出幽林石磴扶池邊
悵靈跡芝熟飯香厨

次韻送皇甫理山

凌晨浥露泫寒臯薄送臨風泣敝袍點翰

心期遙欲寄撫時觴詠望爲勞天邊帆去
征途盡江上雲歸塞影高君到京華應次
對爲言羈羽在蓬蒿

次質山讀客建集

江山自靈氣誰復白雲謠未得消聲累空
知藉詠陶懷情芳杜逕覽歷青林標晚見
蕭然際托言神理超

閱華陽同虛巖輩過常熟至華蕩
眺望虞山指點佳處追想逸遊爰

同餘響

追遊悵往跡卽事感遐心
凌晨越桂浦乘潮放蘭溲
緬茲方中賞宛見物外襟
水碧掇華蕩煙翠指虞岑
隈隩紛掩映崖巘結寒陰
雨色轉遼遠巖意藹幽深
逝湍若在目飛思宵難任
想象展登涉彌使懷長林

送人遊華山

塵世三千劫飛霞百六逢
遠尋從華嶽西眺極陰峯
石榻餘靈氣茅丘訪異蹤
遙知

削成外四合白雲重

又

鹿駕朝來發蜺旌萬里尋霞巔披玉蘂煙
術躡瑤林看就仙人博聽彈隱士琴子先
如借問命鶴到華陰

七星檜三株猶存

探策訪靈異舍舟眺山椒瑤宮闕白日星
檜傳梁朝陰沉肆延囑感此塵外標摧裂
彤多散盤躡意何饒雨氣鬱清姿煙色凌

長霄寒凝苔蘚澁枝偃虬龍驕當皆閱流
歲瓌詭蕭風颭時代忽若遺幾見芳華凋
堅貞自有性曲全非所要殘悴或乘化森
藹神情超嘅惟千載人眷然發長謠

玉陽書院

玉宇疏丹洞芝房架碧煙石封金簡發潭
影桂旌懸授藥逢靈士探符狎遁仙無須
涉瀛海自可得長年

東湖寺

稅鑿多寶地花發四禪林湖近香樓接峯
懸閼殿臨樂音空有樹法雨半成陰若問
阿難結聲聞不可尋

於巖石上眺東西兩湖

且涉溪流深遂凌崖岸坼崩壁落千仞靈
霞此幽宅極眺窮蕪昧層巔振輕跡平湖
兩相映浮湍肆遙脉左盼發天鏡右攬蕩
日鳧波涵積氣渾流翳歸雲白暝翠斂雙
蛾晨靄蘘連壁遠嶠隨煙沉長瀾自晨夕

翔鷁戲羣鷗虎舟挂遙席眷此能娛人乘
飈思矯翮試用忘所遣因之謝拘役

金峯寺

清禪向八關高梵入松山空水侵堦濕驚
濤到寺閒齋餘憐地隙講罷見僧還始覺
棲玄意翛然非世間

寄懷

煙日澹蕪城春雲處處輕高琴遙散響芳
樹遠凝情袂色承香發綦文就石清瑤軒

暢容與惠賞寄平生

詠貧士擬陶淵明

冉冉孤生草托根抱幽石
雨露或自偏况乃異磽壻
朝榮安可倚所貴在山澤
蕭條謝芬芳幸不蒙採摘
荏苒欲終歲惆悵嚴霜坼
貞光苟不耀已矣復何惜

其二

歲暮百念集棲遲倚蓬門
嚴風振中野短褐無餘溫
墟曲不相過誰爲慰藉言
朝餐

書不繼業復無田園固窮非所厄
且得遠世喧思爲木與石偃蹇終丘樊

其三

披衣任稿骸行歌欲何如
巢父抱枯樹乃得終巢居
裘敝不掩形依止無豐廬
方復傲當塗暢然若有餘
靜躁苟殊性物累安足祛
處世尚如此豈要千載譽

其四

士有輕富貴遠惟石戶農
重華稱至治猶

謂道未隆夫妻樂負戴無乃勞其躬大器
恐難任作力僅自充甘之蹈滄海長去不
復逢斯人勵清節終古表遺風

其五

昔聞閉關者帶索常歡顏威輦隱白社龐
公居峴山高林得所棲敗繒聊禦寒作詩
表貞素遁世不肯官丈夫自有意豈獨遺
以安獨處外窮達悠然神氣閑

其六

伯鸞尚節介學能綜羣書居貧身執勤行
業動鄉閭哲妻復相勸遠跡無人墟抗志
明孤尚援琴盡歡娛安能念空乏憂患或
嬰余延想百年內浮游良已虛

其七

仲御甘辛苦杜幾無所酬朝行出採相奉
養惟清流奈何權貴人從之耀軒輶冥懷
固難測恥視忽若浮孀孀貞松標蕩志時
遨遊雲羅不可羈冠裳謝王侯

西山寺

神游淨樂國心蕩廣嚴城世界琉璃遍山
河七寶成冥津緣照徹妙演倚雲清若非
正等觀如何離愛情

謁木蘭祠

游蓋度花遲萍潭出影移斷香疎野逕幽
鳥漾連漪郊色晴看麗溪光晚對宜如何
巖壑意猶自係塵羈

又

平野白雲深分峯俯翠陰草生春水急陽
滿畫潮侵石倚堪邀醉流清欲浣襟花前
一留興江海寄微吟

又

驚泉千礫落晴靄一隄長古屋山空闕無
人桂自芳橋分迴海勢岸曲鎖江光千載
懷餘惠方復奠椒漿

鄭氏山莊

春流映花竹迴岸到閑堂簷向舍泉氣窓

中落礪芳山宜寄游放林欲間行藏不知
谷口鄭懷情多少長

又

烟瀨此追尋雲開北嶺深斜軒清鶴思修
竹聽鶯吟絮暖從飄蕩人幽自陸沉故園
春望外歸客寄初心

讌集林氏

密宇長煙接芳宵會賞同相看情自遠淹
醉興難窮夜幌虛庭月春衣度檻風未須

催急管清影下梧桐

讀列仙傳

玄跡紛高映真文秘簡留青霞訪丹籙翠
洞揖浮丘世表雲孤往人間日浪游無能
逃謫藉何處有瀛洲

又

靈嶽徵仙事探符共隱情白雲丹井出瑤
草玉階明飛友期峯頂輕鑣向赤城飄飄
離塵想無限抱煙清

出近郊

朝驂度桂梁清藹被東岡泉脉穿崖潤花
房覆樹香雙童樵路遠孤艇釣絲長倚策
驚何去迷津亦自忘

春陰

松翠結虛陰幽舫興寄深引流環淺汲焚
桂共餘斟几席籐蘿色軒窓山水音夷猶
皆涉趣煙外命孤琴

雨

棲泊窮愁日支離滄海身薄雲林際濕過
雨曉來頻歲月征途倦煙花游子貧未須
傷物色吾計已沉淪

游仙

寂想切霄階飛輪條上排琳腴滌精髓玉
液鍊形骸綠室鸞音麗丹臺鳳羽諧僊僊
紛屢舞煙挂九龍釵

又

朱沫耀丹泉瓊瑋覆曲筵九華金景馥八

映玉窓懸乘鯉陵陽授飛龜太乙傳遁榮
辭世網高步入寒煙

又

解組尋仙日披綃出霧年繽紛翔絕岳
宵渺赴重玄蕩意靈飛佩潛形內景篇
從來檢真籍名在鳳臺前

又

小藥邁奇齡鮮裳駕紫輶若華疏樹碧琳
扎瑩崖青携命招飛客賓筵禮萬靈倘非

逢累劫應得履金庭

寒食

新鳥窺篔簹隙山厨逢斷煙弱蘿垂已暗
經藥散方然時去頻堪戀春來倍可憐
南中寒自少旅食念歸旋

行路難

勸君早策高足據津要鄧侯荀伯俱年少
功名富貴立談間無爲淹薄淪常調君不
見躑躅君門稱待詔獻賦十年猶未召刻

節苦心事竒藻操觚興寄多華妙投跡曾
無當路饒顧已還貽輕薄誚彷徨雖復濫
軒裳摧頽但不登廊廟得意盈溢欲干霄
失途潦倒空爲笑朝游未醒托沉酣暮愁
無已埋光耀且須世外訪煙霞恨不溪邊
逐漁釣時情已爾竟何云青嶂相期展吟
眺自昔才華或未逢紛紛眼底終難料

春日憶舊游

林扉花裏度春鍾江上雲輕不作峯芳意

但依張緒柳清風來自幼仁松獨將恬曠
標真趣間發玄言想逸縱爲問平生何所
似祇應新月瀨鄉逢

擬李陵別蘇武三首

良會一以失千秋何詎央徘徊念親宴望
望極川梁浮雲西北馳鴻鴈東南翔游子
萬里別仰視河漢長執手語契闊流落思
故鄉悲來不可任幽夜無時光

又

送子臨長道薄暮不能歸樽酒野綢繆中
心起奮飛征馬局悲鳴巖風吹我衣念當
從此訣無復來相依杳杳隔浮世願言不
可希清歌一哀厲淚爲行路揮

又

同爲萬里翼飛止各異林子歸有榮名我
留日幽沉飾駕臨當發重奏飛龍吟奮身
匈奴中猶冀惠所欽垂涕旣已矣寧識區
區心生世何所歡悲痛良以深俯仰戀疇

昔對子不能斟惟當卽潛寐鳧鳧猶相尋

西沖寺

古寺橫江涘春鶯囀霧檐經行殊未已薄
憩遂成淹法宇令神曠青雲使意恬方知
慈願廣塵駕未爲嫌

又

探策招靈賞花宮徹垢氛入林清梵靜投
步衆香聞牖灑青巒氣梁棲碧嶺雲一談
無盡意寂境此中分

壺公行

我本悠悠滄海人，一生獨立無相親。昨偶
擔簦事干謁，無爲繫組空逡巡。初言載筆
銅龍門，以備顧問承殊恩。小器易溢席未
溫，遠斥海郡誰相存。攝符初上逐羣吏，祇
覺紛紛亂人意。深文爲蠹猶易除，新條環
案非難治。更憐輕重不自持，但教喜怒隨
監司。屈節還令阻從事，何能抑鬱常堪茲。
坐對青山味幽旨，泉石淙淙滿情耳。由來

跡以近見欺，亦知賞用遠。爲美物情與我
同，浮雲蠱臂鼠肝渾笑君。遙寄一樽臨水
榭，朝來花竹已迎曛。

華燭引

跋烏匿景墮崦嵫燭，龍引耀臨華池金爵。
文窓炫星彩，銀荷倒捲啣風枝。翠斂輕含
並蒂花，丹蘂雙纏五色霞。檀心重暈凝芳
靄，桂燼流香散碧紗。九華鳳吐朱光爍，六
穗蛾飛瑞影斜。瓊閨夜色依微，永仙閣蘭

輝宛轉賒盧女輕彈玉漏殘楚妃逸舞梨花寒含睇拂拭葡萄席迴眸注視芙蓉鞍
釵長暫欲挂君纓臨河隔霧兩盈盈送笑
嚙蛾流目成自憐嬌豔不勝情

懷古

伯鸞歸越嶠子驥到衡山石室丹芝朗巖
扉碧草閑雲留衣上色霞發鏡中顏聞道
成仙去如何得逕還

木蘭祠

朝揮秋水鞭欵段力不前徬徨臨路欲何
詣行吟傲岸木蘭間亂山遙來集溪上兩
崖中斷飛清泉逶迤未暇窮曲折但見萬
仞凌寒煙祠前石上二三叟指點爲予數
前後當時衆流自洩射萑蒲千里皆蒼莽
日斜不見炊胡麻雲凝荒藪騰封蛇金蘭
有女顏如花障海驅山力可誇風雷簸蕩
林壑怒蛟龍蹶走神靈嗟垂成不覺有奔
瀆感激那能忘怨對意氣還傾烈丈夫自

沉白壁捐柔軀義動山川神得無精感李
侯探禹符白雲夜半開青天驚濤就績流
潺湲頽洞潮聲落瀆澆紛紜澡漑疏清川
靈跡猶疑精衛填鞭石流血同茫然金膏
水碧孕珍怪煙液嵐翠饒平田我來揮手
星河靜山影沉沉發天鏡長風萬里吹月
來對此可以動高詠詠成搔首湖山映興
酬舉酒遙相命君不見道韻平夷稱中聖
天下人倫推樂令孟公正須日沉飲無爲

復與爾曹競鳥聲感人絃亦淒長松蔭礪
桃花低青隄垂柳閑碧瓦時有來祠向岩
下西走羣峯隱光彩東馳溟渤控瑤海蓬
萊石華若可采琴高赤鯉應相待

讀法苑珠林

塵劫歸無盡聲聞芥子中九條分染氎八
部燭羣蒙業盡緣皆妄情祛漏欲空但持
饒益事勝樂躡天宮

囊山寺觀海

閣倚檀林出欄橫淨界凭窮溟空霧遠孤
嶼怒濤凌霄影搖金地煙光低寶繩暫來
聽筏諭慧海渡還能

又

洞覽極雲層陰霞翳屢興仙槎通漢去靈
氣入空蒸隱映鼇仍出溟茫島欲崩方壺
如可問慈濟定堪乘

又

海色憑高盡三山彷彿流錦文沙汭映蛟

彩石華浮激蕩然陰火沖融見祖洲若非
超彼岸業水詎能舟

次升菴山茶花韻

碧檻丹花笑綠煙曛曉色九枝然芳華
始半驚春後韶景方妍觸思前卽賞霞姿
應總惜感時雲藻獨深憐南中興寄堪消
醉祇恐清輝不待年

華燈引

華夜芳飛翠羅瓊卮光泛綠波起舞玉顏

青娥絢爛珠輝丹荷俯擢碧樹枝柯流影
紫霄嗟峨

又

桂彩歎煙璣蘭膏徹瑞扉金瓊星燦爛玉
薦夜芳菲璧月生琳榭虹梁春正輝

擬飲馬應令

赭沫來飛鞚翩躚度苑墻流清驕影亂花
暖散蹄香映澗驚龍躍臨空似燕翔還當
西極至朝電欲爭光

置酒坐飛閣

清夕啓高筵飛除迥出煙蟲網映空翠燕
楹寒綠泉餘花雕檻落華纓繡柱懸詎能
將感感歡興欲千年

上巳篇

春禊俯清流飛花點曲洲目延鱗浪轉思
逐羽觴浮綠淨林光映紅酣澗色留冶情
來翠幃俠意動華輶影入衣香寫瀾迴騎
吹悠風絲呈嫵媚烟帶弄輕柔魚躍青波

穆鶯吟素瀨幽敷榮欣朗化豫悅感芳游
採艾還臨岸寒蘭亦繞溝豔歌鳴玉薦詎
可托綢繆

上巳

遵渚狎年光氤氳匝樹芳時鶯嬌轉葉煙
液醉垂楊滿握柔蘭氣盈觴湛礪香還逢
拾翠羽併佇桃花妝

又

薰被盛芳朝妍光鏡野嬌豐翹非一色

綺競千條羅薦香生蕙紈綃氣映椒定知
情未已洛浦正相要

高臺眺飛霞

落日臨高臺眺遠流霞來井柯晚增映巖
枝寒自開目極靄生色望分煙詎催不言
容易散爲復引浮杯

擬游匡山簡寂館

三梁跨絕礪九折逕微通靈氣浮雕館珍
霞棲桂宮流懸光自鏡谷斷勢如弓漏穴

飛林葉空巖長樹桐雲驚猶繞榭月在半
疏風恍惚神仙地如何此世中

賦得江湖泛別舟

三翼泝湘潭千尋翠浪涵風鳧依渚夕霜
葉下江南纜影牽凝碧船文亂鬱藍離言
岸花落獨自渺難堪

香爐

清宴栢齋前薰香宿火傳琴心幽桂韻書
帶馥蘭煙迷迭溫柔泱茱萸意緒憐雲輕

巖幌色芳素自教妍

至魏塘

晴煙映綠堤羽吹挂風絲鳥散雲中樹花
淹石上池蘭臯芳潤落松蹊夕陽滋耐可
憐清媚塵羈空爾爲

春夜宴集

良夜清歡遍情淹桂酒餘嬌絃停度曲芳
意繞飛除春漏依樽永風花入賞虛無言
薄流滯酣興得蕭如

夜集驟雨忽作

晤言消永夕庭院起長雷溜水涵香砌清
瀾洗石苔杯迎暄靄散座徹澗聲來漸覺
成沾醉孤心亦自開

春雨遣懷

悵然浮跡每多違轉覺筋骸少壯非空自
沉冥傷數化已知寥廓總忘機淫淫曲牖
淹長雨澹澹新松引薄輝白首著書吾不
負山中茅屋正思歸

柯氏夜集

遠尚追彭薛高名似邴生酒中偕浪跡煙
外共縈情迥席宵鍾徹深堂燕語清因君
投跡早彌使誠南榮

順東西門行

旅長世飾虛名曦御倏忽浮雲征奄相馳
不暫停悲迷惑道任頽形服日精讀仙經
尋赤松子安期生丹九轉芝九榮馭鸞鶴
駕戲紫庭景未遷會已盈逐風颺舉歛飄

輕辭親愛解塵纓共樂相樂窮歡情

分署寄懷

旦坐紛無緒嚴庭芳氣清露臺移積蘚風
架散翹英跡屏從喧隔簷虛欣鳥鳴目爲
流靄豔心以素輝明祛吝神應遠耽幽念
自輕貞標安所寄併佇紫芝情

鞠歌行

勢所畜達者賢骯髒饑窮倚道邊容曲折
體便娟乘權握紀福澤偏亭伯擯元叔遷

憤世矜倨爲累然傷直道惜徂年日月逾
邁孰云延罕生逝國氏憐厲志苦身無復
言一爲顛咳唾間刎頸慷慨奉周旋

春暮過南山寺

携步窺松頂尋游悵刹塵靈飈清石梵忍
草沒仙輪管發瑤華夕雲興懺禮晨求余
成果願已爾證三身

擬過趙法師精院

爲道任浮游來乘軒后秋抑茲泉石戀遙

爲禁林留九彩神丸就千齡鶴氣適金庭
逢乳溜玉榭挹霞流坐守嬰兒化時尋姪
女幽未須訪員嶠此自有閑丘

擬送趙法師還蜀因名山奠簡

玉簡將初命真文奠岳庭國祈由道氣方
望表云亭白鶴依然至青城宛自經爲當
邀赤斧服石邁奇齡

初蒞長樂縣作

振策尋幽嶠乘軒惠海垂政衰觀俗散代

瘵血風離詎少仇香托空多宓于思理人
倘可試聊復慰樓遲

又

亂嶺雲深入危旌海色懸島間來異舶沙
際見墟煙禮數酋豪別誅求赤子憐夷方
傳漢澤感泣下車年

又

烏路關河外山城蜃氣中瘴含扶荔雨蒸
入豫章風異候煙常濕連天水似空一爲

陳德讓殊俗化應通

從巡車重至汀州

江山回首十年期風物依然似昔時匹馬
從教凌曉度垂楊無那使人悲雲生幽澗
秋先動羽落丹青歲已遲一訪棠陰追往
事止煙汀月共妻其

夏日書懷

清院氣森沉高槐散午陰卷簾藤影借臨
砌竹風深池色虛仍映林聲靜自吟徜徉

還竟夕即賞契遐心

又

往懷同逝水萬里憶摧殘高詠聊爲適長
游積已闌跡隨青嶂外心在白雲端未遂
巖耕計還因漢澤寬

又

長晝耽沉寂風來迥自悠倦知筋力緩閑
覺簿書尤日影下空澗雲陰翳一丘翻憐
從郡邑徒說富民侯

又

浮涼清夏室香散落新花聊可鳴琴薦方
持白羽誇夢令塵意暢醉使逸情加是處
愁堪寄何言獨去家

又

樹色交庭隙輕颺動四榮寄心從釋顯立
義擬因明才在神還累名虛業未輕清齋
臨結夏無使鳥王驚

寄遵巖先生

夙昔抱竒志流覽洞八荒圖籍散東壁沉
吟玩華芳心亦自有施踟躕獨難詳竭來
節不固倏忽凌雲翔謁
帝造丹極婉孌集東廂託身非所宜蒙恩
一何長紛紜謝簿領濡翰太微堂懿此寄
空虛感嘆不能忘

其二

曰余實靡逮登事力未陳傷隊何所嗟棄
去若游塵常恐先朝露含意不復申恤茲

篤嘉惠越遷遵海濱聊爲示輕譴庶乃勵
憂勤便復委叢牒奄忽彌冬春沉迷日不
暇勞歌多苦辛遑遑岐路間幸忽邁所親
款問情內結哀此遠遊人慨我欲自列不
覺摧心神大道夷且直牽復浩無因

其三

情人一何篤慷慨以長歎徘徊敘親宴旨
酒屬所歡華燈曜緹幕良眷氣若蘭離坐
起高唱僂俛排思端榮枯安可期我情等

憂患縻滅隨蔓草不足回達觀幸有清商
曲能使中抱殫

其四

炎雲散蒸暑華榭蔭曾輝瓊木鬱中園日
暮楊英蕤高會未須臾促駕臨當違乖人
易生感寸心愴以悲少壯不自樹去日不
可追芳願紛消散百年會有歸榮名天地
間皦皦伊可懷安能望君子千載惠音徽
雕飾一以借引領情依依

偶題

垂楊接屋乳鴉飛
池影沉沉綠染衣
草隱曲欄齊短徑
雲來清晝豁雙扉
閑齋幸有虛房契
採藥寧知望路違
便約支郎與驃騎
從今揮手了無機

秋日書懷

憶昨浮遊去紫庭
風煙日日泛江舲
可煩蔓草連空暮
遠愛孤峯出意青
林吐潛涼消仲氣
觴傾碧玉湛流泠
醉中起舞雲相

盪零亂寒光似落星

又

匡坐含毫藻獨揮
風流應亦似君稀
著書自信揚雄是
前席還疑賈誼非
靈瑣情來秋入夢
瑤臺夜後月生衣
迢迢望隔明河淺
涕下霜空見鶴飛

又

凝輝初謝詔西皇
煙際菲菲吐夕芳
飄寄自憐同適越
弄姿猶遣似游梁
酒酣散髮

深林下日暮狂歌大道傍却笑子山憔悴
盡如今休更信迷陽

又

攬鏡凄然惜歲華逝隨孤鳥薄天涯却瞻
皇邑情空劇引領雲山跡愈遐汎汎驚蓬
傷宥子飛飛摧羽畏羅家那堪林外殘霞
色已自紅勝上苑花

又

高臺臨眺晚多風無限牽情萬里同岐路

音形寘夢裏他鄉親昵鴈聲中秋溪薄泛
侵雲闊煙月輕籠映水空莫以南枝懷代
馬且將衰候寄江楓

又

雲間哀鵠蹈虛翔有似孤游去故鄉越觀
仰天重扣角閩州訪古一沾裳已無營慮
知秋急何事牽懷失夜長明月峽西猿更
切蕭蕭木葉下微霜

又

早來爲計亦難誣一劍蕭條意氣俱但見
出門生遠色豈知臨路轉多虞木強與世
謀誠拙瓠落將時用竟迂憶自隳官去燕
甸何人凭檻笑侏儒

又

延清宮闕紫雲端香桂金塗碧殿寒枚馬
西都同待詔應徐鄴下各馳翰三芝映日
開扶荔五柞連陰接上蘭霄漢幾時還振
翼祗疑江海潤能寬

至蒜嶺迎軍

芳甸迂鳴珂旌門壓左和風威逾赤水靈
略震蒼波勢舉龍荒集帆通日域過勒銘
應有待勞率自成歌

又

言總三河士還興六月師濤深凌疾舸海
暗激鳴鞞絕徼紆長攬雄圖事遠羈從來
重綏服羞說孟諸麋

又

劔發動星文旗開拂曉雲塞塵衝霧起征
吹入空聞指顧方隅定徐麾勝勢分平生
仗奇氣萬里獨要勳

回次楓亭

策騎度林氛歸禽送夕曛風移千嶂影水
落一溪雲睇絕荒煙見聲虛戍鼓聞翻驚
少年意今日羨從軍

又

旌蓋帶晴暉秋光上鐵衣山川形勢出魚

鳥陣圖稀景靜林間倚花閑澗底依誰
去高卧嘗茹首陽薇

閑懷

代謝關人事盈虛落酒中高齋清朗夕微
月澹遙空自可邀園客何須問苑風青山
曾未隔早晚寄歸鴻

又

令月肇玄風晨齋藿與莪貴無情想失超
有谷神同草解舍虛映花驚離染紅蕭疎

生遠韻閑與道爲通

送沈博士

同向關河外高秋羨獨還
客程經瀨水別夢到閩山
草長知詩就花明覺興閑
沉情欲有寄芳樹眇難攀

送陳學諭

客歲幾開顏相逢似夢間
忽驚蓬更轉重訝思如環
暮色侵榆海秋風度石關
禽來窺散秩幽砌蘚成斑

雨後

山雨鳴秋館溪風入夜檐
疎光輕似羽流嚮切疑蟬
貴我知方少欽玄習已恬
迢迢寄虛宇不必問長淹

聞暈移

久客難分去住心誰將消息到江潯
官於蟬翼風前薄意與秋河夜後深
別鶴從知猶眷戀此身何得尙浮沉
古來拊髀思同世莫以遭逢感滯淫

又

幾年濡跡尚南轅常日低眉愧昔言竊食
總令容偃蹇淺才終自絕攀緣驅馳已及
勞資後填委何須吏治煩從仕人皆薄州
郡陳咸况是欲消魂

寄人

搖落應將返故園殘燈客舍聽秋猿音書
欲寄何時達離緒雖多未忍言葉下空庭
溥白露烟藏疎雨送黃昏愁深不斷西歸

夢矯首浮雲祇自繁

寄盧生

長年游履興方闌倚杖中宵永自嘆結宇
幾時依絕岳揚橈從此放清瀾少文夙有
圖書戀漁父空知鼓枻歡爲語盧郎辟煙
徑早須乘月候江干

寄陳子

祇今爲仕易前薪何事飄零尚此身柰爾
薄游成落鬼知予失計欲沉淪恣心漫學

何徵士調笑還同郭舍人原樹豈無堪挂
檄相邀谷飲寄交親

重至泉郡

初日抱林升連岐曉峻登巖姿凝露蘚澗
嚮卧秋藤入浦雲如待沿流興可乘旅途
頗更遠極目自難勝

又

立馬秋原上風多景氣沉長墟平遠色殘
樹帶浮陰山磬溪煙度松聲野迳深空

芳歲晚留滯尚如今

至安南作

長巘自堪迷深攀願愈睽輕枝分蹙密垂
榦抱煙低倏忽隨征鳥迴沿歷去溪入門
成旅泊懷思轉淒淒

清源山

疎雨明秋序寥天一鴈飛巖阿下涼色洞
戶倒斜暉驚壁凌空直游雲去谷稀欲憑
窺海岱千里共霏微

又

端憂不自聊山色繫征輶壑轉風生穴崖
虛夕上潮輕霞被海出孤月隱林遙凝望
長懷積煙途詎可超

夜雨

解鞍虛館夕雨氣到牀深歸夢頻疑昨吾
衰遂至今能持誰定力常寂自希音客子
悲遙路堪憐遲暮心

旅思

煙氣杳然至空庭坐自驚蕨薇關意緒芝
桂係心情治節齊干木貽書勸子荆洋洋
顧周道軒冕未能榮

又

冥寄對秋陰誰知靜者心倦來方枕石跡
遠似巢林衣帶他鄉緩煙雲夢寐深如聞
有竒士策杖一相尋

客建集卷之四



國家圖書館. NATIONAL CENTRAL LIBRARY. TAIWAN. R.O.C.

八
容
建
集
卷
四

三
六